

5214.7/7964b(27)

27

HARVARD
UNIVERSITY
LIBRARY

18504

明詩紀事

貴陽陳田輯

庚籤

張元怵

一首

元怵字子蓋紹興山陰人隆慶辛未第一人及第授

修撰進左諭德兼侍讀有不一齋文選七卷

登第後寄親友

昔余秉微尙築室稽山幽嘉朋日萃止六籍事冥搜顧慙學
術疏徒然抱先憂屬時際休明葑菲誤見收弱羽乘風雲眇
質依嵩邱皇恩等蒼天捐糜難爲酬寤言循素履黽勉希前
修眄彼鴻鵠舉詎爲稻梁謀

鄧以讚 一首

以讚字汝德新建人隆慶辛未第二人及第授編修
移疾歸起中允不赴再起南祭酒就遷禮部侍郎改
吏部再改北吏部贈禮部尚書諡文潔有定字先生

集四卷

田按文潔通籍後居西山三十年在官僅滿一考清
介之風可以抑浮競與華亭陸文定後先媲美

答張洪陽道房見寄

聞雁秋懷起思尊歸夢頻暫陪仙署吏自是倦遊人有病過
從少無家僮僕親壯心今幾許清賞在江濱

吳中行 二首

中行字子道武進人隆慶辛未進士選庶吉士授編

修以論張居正奪情廷杖為民居正死起故官進右
中允歷洗馬攝司業事進右諭德乞歸起南侍讀學

士掌院事未任贈禮部侍郎有賜餘堂集十四卷

靜志居詩話江陵奪情事在萬曆五年七月迨十月
之朔彗星見大內火於是既望三日吳公疏上次日
趙檢討用賢疏上又次日艾員外穆沈主事思孝疏
上江陵怒不可止而諸公均受杖矣方杖時鄒進士
元標疏復上一時士氣持正若是許文穆以庶子充
日講官為吳趙二公饒鑄玉杯一銘曰斑斑者何下
生淚英英者何蘭生角其理琢之永成器以贈吳公
犀杯一銘曰文羊一角其理琢之永成器以贈吳公
首黃流在中為君子壽以贈趙公玉杯今不見犀者
為吾鄉何少卿裴音所得余嘗飲此作歌
田按子道集中植綱常疏為江陵發也正朝廷疏為
吳門發也是時吳門為言路所詆求去九卿多上疏
留之者子道疏云借留賢之名而保輔臣此諂諛之
極也甚可恥也上言大臣德政律有明條輔臣者股
肱也或因事乞歸被言投劾宜去宜留聽之朝廷何
邇年以來每遇輔臣辭位必羣然起而留之頌功贊

德累牘聯章此其心何心哉其言甚正子道與趙用
賢論江陵奪情被杖江陵死後起官上頗嚮用史稱
用賢性剛負氣傲物數嘗議大臣得失言官江東之
李植輩爭嚮之大學士申時行許國等忌焉會植東
之攻時行國遂力詆植東之而陰斥用賢中行謂昔
之專恣在權貴今乃在下僚昔顛倒是非在小人今
乃在君子意氣感激偶成一二事遂自負不世之節
號召浮薄喜事之人黨同伐異罔上行私其風不可
長蓋國先與吳趙同官翰林刻玉杯犀杯贈之其詞
激烈厥後國入政府附和吳門又吳趙為上所嚮用
心忌之遂肆口詆訾不遺餘力利害切膚與向所贈
之詞先後刺謬君子於此觀人品焉

送王龍州座師使事還里

太行秋色不禁寒六傳西征擁繡鞍使節再將仍問俗除書
兩考不遷官內廷供奉含香侍故國馳驅負弩看清世台垣
多氣象上卿早晚入長安

過彭城簡莫憲使

幕府依然病客過只今無夢到鳴珂官情合自風波減聖德
元從雨露多高枕尋常消白日片帆信宿下黃河夕陽貫得
新豐酒何處逢君一醉歌

周嘉謨一首

嘉謨字明卿漢川人隆慶辛未進士除戶部主事歷
郎中出為韶州知府歷四川副使按察使布政使以
右副都御史巡撫雲南進督兩廣軍務兼巡撫廣東
加右都御史遷南戶部尚書召拜工部尚書改吏部
以忤魏忠賢引歸削籍崇禎初起南吏部尚書加太
子太保贈少保

田按少保正色立朝當魏忠賢得志之初持正不阿
屢疏求退忠賢矯旨許之其性辭出朝詩云連章得

請賦來歸丹陛陳情淚溼衣自信心長緣髮短敢云
昨是覺今非兼驅猛獸無長策閑伴浮鷗有息機獨
使至尊勞旰食難將寸草答春暉夫惟大雅既明且
哲少保足當之矣

答胡公占

幽興從來愛薜蘿名園高峙帶江沱竹間有客攜琴人花裏
容人載酒過百里星原因德聚一宵話勝讀書多只今春色
郊原滿何日相期卧綠莎

王祖嫡三首

祖嫡字肩昌信陽州人隆慶辛未進士選庶吉士授
檢討遷國子司業歷洗馬進侍讀有師竹集三十七

卷

田按時人有議王元美父子之禍為元美激之者肩昌作書辨之曰人言分宜父子甘心揚忠愍元美時

為郎與二三君子哭之痛相嗣聞而惡之謂所親曰胡不移此哭乃公由此司馬公不免嗚呼司馬公之冤不繫元美哭與不哭也昔漢暴彭越屍有哭者夷三族而纒布哭之後世且多其義茲忠愍非越比又無禁令乃於不可知之事不可測之禍傳仁人孝子耶至於沈酒縱飲必分宜當國時元美畏禍故以此自污不則洩憤宜鬱昔人所謂長歌之痛者耳元美引之四十子之列且贈詩曰傾蓋豈必深慨焉成辨謗即此謂也肩昌詩長於詠古

溫泉

幽薊煙塵激九重貴妃湯殿罷歌鐘中宵扈從無全仗大駕
蒼皇起六龍絛匣尚留金翡翠暖池猶浸玉芙蓉荆榛一閉
朝元路唯有悲風吹晚松

乾陵

乾陵雙闕峙高岡象馬夷酋儼列行一代大倫爭子姪三朝

宏業忽周唐南山枉費秦皇錮西盜終窺呂雉藏無字穹碑
誰記述九原重起駱賓王

岳墳

殘雪方舟渡六橋棲霞祠宇薦山椒金牌鐵馬無勞問白馬
朱旗尙可招北宋陸沈三字獄西湖水接伍胥潮祁連鬱鬱
環孤塚麥飯諸陵久寂寥

馮時可二首

時可字敏卿松江華亭人隆慶辛未進士除刑部主
事改兵部歷員外郎中出爲貴州副使改四川歷廣
西湖廣參政有西征超然樓天池石湖皆可繡霞北
征後北征燕喜滇南武陵等集

明詩選陳臥子曰吾鄉元成可方吳門劉子威
靜志居詩話元成詩極爲牧齋錢氏所詆就全集而
觀甫田彌望稂莠汙萊獨五古一體尙有遺秉滯穗
可供拮拾以比劉子威翻覺勝之
田按元成博綜下筆千言娓娓不能自休談史談藝
當時異聞軼事往往散見集中惟詩不能成家

遊飛雲巖

自余探幽賞會心惟此山突兀聳芙蓉支嶺若連環攢丹冠
斜日浮翠亂秋煙溜溜滴寶乳泠泠響溪泉苔壁圖綵繡松
濤韻清絃侵戶澗芳馥射衣雲影鮮去美非一適來奇變萬
端狗華豈達生獨往復何言

馮時可西征紀宿月潭書院時已夜半泉流有聲疑
爲風雨疏軒視之星河森煜由樓後礮石磴折而上
謂飛雲巖去地百餘尺上突下嵌巖下可坐數百人
石如虬奮如翬矯如霞攢勢飛動左有深洞巖前三
石峯如三指志稱錦嵯珠壑非虛也
田按飛雲巖在黃平州城東二十里爲吾黔最奇之

境王陽明有記

庚錄卷十

五

同申少師飲凡夫齋中

緬懷新築勝丹閣俯嶙峋閒擊山中相幽尋世外人瀑飛剡
溪雪花發武陵春便欲移家住於斯並采真

郭子章一首

子章字相奎泰和人隆慶辛未進士除建甯推官遷
工部主事歷郎中出為潮州知府遷四川僉事歷浙
江參政山西按察使湖廣福建布政使以右僉都御
史巡撫貴州進兵部侍郎右都御史兵部尚書加太
子少保有粵草十卷蜀草七卷浙草十六卷晉草九
卷楚草十二卷閩藩草九卷家草七卷黔草二十一

卷養草一卷苦草六卷傳草二十四卷

過餘慶司

餘慶山行踏磴危幸逢春仲日遲遲荒村祭賽仍茅屋新戶
編門半竹籬夾道櫻桃開白蕊隔江楊柳換新枝猶聞豺虎
當吾路去去埋輪一問之

黃洪憲一首

洪憲字懋忠嘉興人隆慶辛未進士選庶吉士授編
修奉使朝鮮還進侍讀歷右庶子遷少詹事掌翰林
院事有碧山學士集二十一卷別集四卷

田按碧山學士萬歷戊子主順天試取王文肅子衡
為榜首李鴻又申文定壻也為言者攻許朝命覆試
文皆如格學士疏十上乃得歸後言者猶以為口實
在籍聽勘學土工於制舉文詩非所長

庚錄卷十
上疏後長安友人相訊賦謝

閶闔天高五鳳樓覆盆何幸徹宸旒故人霄漢誰青眼老我
江湖已白頭涉世總知名是累論交惟有淡相投山翁到處
堪瓢笠一笑從人呼馬牛

郭子直一首

子直字舜舉崇德人隆慶辛未進士除行人厯官福
建按察使有三遊草

小園

扶疏草樹繞空亭隱几山光雨後青吏散鴉曉明月上一簾
花影讀黃庭

劉珠一首

珠字福井公安人隆慶辛未進士除戶部主事有疑

菴集

國史唯疑劉珠舉丁酉鄉試越三十五年辛未始成
進士江陵少以父執事珠每計偕攜一烘魚為饋諸
僕役熟識之曰公安孝廉又來矣卒為江陵所取士
壽日獻詩要知座主山為壽但看門生雪滿頭江陵
笑曰此老故態也然珠無所附麗又十年終計部郎
想世態已所熟聞

過襄陽

高城百尺倚雲霞夾道垂楊盡宿鴉春雨綠添習池水晚風
紅落大隄花橋橫畫舫明江岸人唱銅鞮過酒家景物不殊
鄉土近高堂猶自憶京華

熊敦朴一首

敦朴字茂初富順人隆慶辛未進士改庶吉士累官

貴州參議有玉堂漫稿謫居稿

送沈比部謫高州

當代論才子人推沈隱侯
一身重彝鼎萬事等浮漚
已分沈湘去難期眾楚咻
遷人終汨沒天意欲沈浮
聞道高涼郡深樓賜環如有待
去矣莫夷猶

吳中立 一首

中立字公度浦城人隆慶辛未進士以終養歸起禮

部主事未赴遷尙寶司丞

梁章鉅南浦詩話公度登隆慶辛未進士疏請歸養父沒服闋應就選喟然曰古人為祿養今祿不逮親矣遂絕意仕進入武夷杜轄巖構養恬菴而隱焉張侍讀元休以詩訪之云杜轄巖中人曲江舊同席未

遊武夷

折彭澤腰早著東山屐棲心老氏書結廬武夷側清峯萬點青雲溪幾條曲竝閣夾長松丹房架危壁巖頭露可餐巖下芝可摘獲鶴時為羣車馬杳難即我本邱壑人聊佐金門客煙霞夙同好出處偶殊迹諦觀聲利場何似神仙宅四十已無聞百年亦瞬息脩然赤松子巢居鍊形魄明發出閩嶺題詩訂泉石

溪流寒玉山圍翠飯熟青精石乳茶怪得曾孫貪住世不離
煙火是仙家

秦耀 一首

耀字道明無錫人隆慶辛未進士選庶吉士改兵科

給事中歷刑科吏科遷太常少卿改光祿擢僉都御

史巡撫南贛改湖廣有寄暢園詩集

清籟

寄暢園二十景之一

庚錄卷十
竹光冷到地幔卷湘雲綠隔塢清風來聲聲夏寒玉

方揚一首

揚字思善歙人隆慶辛未進士除陝州知州遷南戶部主事改隨州知州歷嘉興同知進杭州知府有初菴集十六卷

冬日同方子及齊王孫吳山人遊牛首

選勝出塵埃叢林一徑開雲陰懸石磴木末起層臺山帶寒煙暝江涵夕照來憑虛望不極磊砢思難裁

周光鎬一首

光鎬字國雍一字耿西潮陽人隆慶辛未進士除甯波推官遷南戶部主事改吏部歷郎中出爲順慶知

府遷四川副使進參政歷陝西按察使以右僉都御史巡撫甯夏入爲大理寺卿有明農山堂彙草

謁武侯祠

錦江十里錦城東丞相立堂翠靄中魚水君臣興蜀漢龍蛇風雨走祠宮參天老柏巢雙鶴落日長橋飲斷虹一自杜陵題詠後直令千載泣英雄

王教一首

教字子修淄川人隆慶辛未進士官吏部郎中有銓部集

清風亭對月

永夜不成寐猶憐旅興生何來江上月解作故鄉明別院繁

砧響寒雲墮雁聲寥寥杯酒後悽斷若爲情

詹沂一首

沂字浴之宣城人隆慶辛未進士授新建知縣擢南
吏科給事中以忤張居正出爲山東僉事旋削職歸
起奉化知縣遷禮部主事歷員外遷光祿丞歷南尚
寶太常太僕卿進左副都御史有潔身堂集

宣城事函萬曆丙午除夕上謂左右曰此時廷臣受
外覲官書帕開宴打開惟侍郎楊時喬李廷機副都
詹沂三人清寂可念其爲上知如此

施肖華謁徐選部不遇詩以慰之

挾策遊燕市蕭然鬢已疏不逢楊得意誰薦馬相如此日空
彈鋏何門可曳裾窮途莫漫哭好返薜蘿居

謝師啟一首

師啟字叔蒙蒲圻人隆慶辛未進士官參政

五嶽觀

千山回合繞清溪落盡桃花路不迷笙鶴不知何處去春風
只聽子規嗶

宋儒一首

儒字大中麻哈州人隆慶辛未進士選庶吉士改禮
部主事

慶成宴

金輿玉輦漢郊還紫殿瓊樓捧御筵簪珮千官分廣座笙鏞
九奏合鈞天霞漿共醉蓬萊上雲祲新開日月邊天保欣逢

魚藻慶齊將華祝頌堯年

林章 七首

章初名春元字初文福清人萬歷癸酉舉人有林孝

廉集

小草齋詩話林春元才士也桀驁不羈常作蛾眉篇
自述其意才情楚楚信自可人
石倉文集初文才士不欲以庸孝廉是處好為人排
難解紛乃以無心獲罪謝司寇出之縲紳之中適遼
海有警累上書進奇策願身列戎行練甲兵備緩急
為嫉者所繩觸憲而死詩如客情如春草無處不堪
生無家逢寺好多病見僧親曉煙常帶雨夜月忽嘯
禽千山風雨裏一任子規嘯春風與柳樹年年是故
人春好年年晚月寒夜秋皆絕酸楚
露書林初文嘗在揚子江中青山口覆舟坐皮箱上
見有持紅燈二從前過隨木商救之又嘗夢人贈之
以扇上題茂陵風雨四字自意不佳後以上書得禍
因作蛾眉篇云茂陵風雨千秋夢揚子波濤一夜悲
列朝詩集閩中詩派宗子羽而福繼之以撫倣蹈襲

為能事初文才情跌宕於唐人格律時欲跳而去之
要能不為閩派所羈繼可謂傑出者也世宗末倭寇
犯閩初文年十三上書督府求自試行間既舉於鄉
累上不第走塞上從戚大將軍游座上作欒陽宴別
序酒未三巡詩序並就將軍持千金為壽緣手散去
挈家寓金陵憤南曹曲法斷獄奮臂直之坐繫獄三
年始去關白之亂兩上書請用奇兵出海土勤賊報
聞而繼又抗疏請止礦稅兼陳立兵行鹽之策帝感
動下內閣票擬舉行四明相承中人指閣其事密揭
請逮治望闕長歎憤懣撫膺即日下獄暴病而死天
下惜之
閩小紀福唐林春元七歲能詩師召試之適有牧羊
者指為題即應聲曰三百羣中步獨先有時高叫白
白雲天會從北海風霜裏伴過蘇卿十九年後舉於
鄉更名章有集行世才情凄婉
漁洋詩話初文有送人詩云不待春風不待潮渡江
十里九停撓不知今夜秦淮水送到揚州第幾橋以
示梅禹金禹金激賞之宣城有老儒邱華林嘗以詩
質禹金但為分句讀而已見而大恚曰林詩二十八
字正得二十八圈吾詩字數不啻倍之乃不得一圈
耶聞者笑之
田按初文詩才情俊爽聲調淒涼有賈生年少之風

受正平傷生之累可惜也

金陵懷古

長江一洗六朝兵
江北江南無限情
剩水殘山吳故壘
閒花野草晉空城
石頭古樹逢秋落
浦口寒潮入暮生
最是天涯留滯客
不堪商女蹋歌聲

潞河驛

冷風殘雪潞河灣
十載家鄉一日還
不作揚雄投漢閣
甯爲樂毅出燕關
漠南廬帳連三輔
海上樓船動百蠻
無路報恩空有劍
春明回首淚潸潸

居庸關見阻示同行

怪得關前逐客頻
匈奴早晚欲和親
無襦應不空還漢
有舌

何須定說秦
雨氣千峯營幕曉
梨花三月塞門春
憑君斗酒城頭話
猶勝新豐店裏人

酒舍

壚頭竹葉千杯有
扇底桃花四月無
且放歌聲滿天地
莫開醒眼向江湖
南人不復憐鸚鵡
北客何須悵鷓鴣
芳草斜陽看不盡
春明門外獨躊躇

別妓

畫漿夷猶錦纜迴
美人東上鳳凰臺
朝朝疏洗臨秋水
一路芙蓉不敢開

崔季鶯

怕教雪落歌應懶
愁作雲飛舞不輕
偷向東風噓柳畔
一行

花雨一聲鶯

楊柳枝

楊柳青青河水濱
春來日日送行人
東風不與長爲主
送盡行人卻送春

麥應中 一首

應中初名來牟字孺時東莞人萬曆癸酉舉人

山行

王孫歸路草萋萋
落日青山失舊蹊
直道未應行不得
鷓鴣何事向人啼

明詩紀事

貴陽陳 田輯

庚籤

孫繼皋 十二首

繼皋字以德無錫人萬曆甲戌第一人及第授修撰
歷諭德庶子少詹事兼侍讀學士遷禮部侍郎改吏
部贈禮部尚書有宗伯集十卷

四庫總目繼皋詩文雍容恬雅有承平臺閣之遺風
葉向高蒼霞草孫公論撰溫夷冲粹
田按宗伯五言冲淡有其鄉華子潛風調

送李山人

故人驄馬客春盡一書來
分茗供幽事論詩得異才
林塘堪

下榻風雨且深杯茗水逢新漲孤帆何處開

雨霽有懷錢徵君 二首

去住各何意交情中路分
長安一夜雨漂泊倍思君
樹靄淡初日城陰低暮雲
雁鴻那可問空自惜離羣
戶外雨不歇憶君初到時
青山一以隔華髮總堪悲
世事酒杯過閒情鷗鳥知
離居未可道含意爲裁詩

夏日臥病 四首

客久堪誰過官閒穩自慵
琴書供病色花竹散塵容
晝杳滄洲夢時尋白鶴蹤
東方有高隱吾意尙相從
會心那在遠小築見幽情
過雨宜花事當風忽鳥鳴
青山供臥起白日廢逢迎
懶病依然慣非高吏隱名

不淺煙蘿興塵中自掩關
詩情消白日病骨傲青山
野鶴焚香下閒雲散帙還
浮名將薄宦吾意有無間

乞假辭朝謁耽幽學隱淪
病翻思客至閒不厭官貧
高樹團晴靄穠花戀晚春
物華偏在眼肯惜酒杯頻

送華三還南

彈鋏竟何意挂帆秋滿船
艱難爲客倦慘淡逐人憐
世路浮雲外鄉心落日前
西風吹易水因爾一潸然

儀封道中

草草出門去那知成遠遊
風塵難自料徒御總含愁
有夢依鄉樹無書報野鷗
歸心指河水日夜向東流

舟中漫興

彩鷁去仍還青林許共攀愁翻因止酒病不礙登山古寺蒼
藤路飛泉白石灣何妨住十日與爾聽潺湲

秋仲龔方伯曠適園社集

水檻秋逾淨晴郊暑未消露荷仍的的風葉自蕭蕭對酒宜
疏豁參玄契沈寥城頭暮吹笛疑有列仙招

寄酬李宛平內鄉

京兆田郎題柱客相逢我未厭承明幾陪韋杜春同醉一別
荆吳歲屢更丹地不紫歸客夢滄江難忘故人情尺書傳字
來何處愁聽流鶯樹裏聲

余孟麟一首

孟麟字伯祥江甯人萬曆甲戌第二人及第授編修

天國
歷南司業洗馬侍讀學士掌院事有學士集二十卷

答張山人

茅檐帶清溪疏松倚盤石裊裊挂飛蘿影入溪水碧抱獨諒
在茲撫物欣有適鉤簾聽流鶯攜琴候逋客不見白雲歸惆
悵日將夕

趙南星七首

南星字夢白高邑人萬曆甲戌進士除汝甯推官入
爲戶部主事改吏部歷員外郎中謫平定州判尋斥
爲民起太常少卿改右通政進太常卿擢工部侍郎
拜左都御史進吏部尙書以忤魏忠賢謫戍代州崇
禎初贈太子太保諡忠毅有忠毅集二十四卷

高攀龍高子遺書儕鶴先生為小詞多寓憂世之懷
 酒酣令人歌而和之慷慨徘徊不能自已
 姚希孟棘門集江陵相病朝士徧走羣望忠毅趙公
 與顧公憲成姜公士昌戒勿往仍為紀事詩曰二監
 能憂國千官為祝年傳播人口趙公詩步武少陵淋
 漓沈痛語使人欲泣欲嘯欲縮地而談欲排闥而愬
 易水擊筑之音於今載見
 列朝詩集夢白公忠強直負意氣重然諾有燕趙節
 俠悲歌慷慨之風鄉里後進依附門下已而奔趨權
 利相背負酒後耳熱戟手唾罵更為長歌小詞度語
 吳歌打棗竿之類以戲侮之其人銜之次骨夢白不
 知也在戍所賦詩飲酒唾罵笑傲一如平時不以謫
 居畏禍少有貶損人謂寇萊公蘇子瞻無以過也
 王士禎蠶尾續文高邑趙忠毅公北方偉人天下望
 之如泰山北斗詩長於古選頗有法度而又能自見
 其才思
 田按忠毅三歷銓曹一為太宰激濁揚清凜不可犯
 可謂薑桂之性老而愈辣詩亦風骨聳峻

短歌行

天迴地周時不我 甬少壯易老胡 多憂有客盈堂有酒盈

觴鏗鐘考鼓聊為滛荒中區迫隘 令我心惻白雲在天安得
 羽翼功名有數樂當及時商髮一 暮雖悔莫追愁令霜隕怒
 感山傾不如飲酒可以樂生維山有阿維河有潯嗟今之人
 誰知我心

長蛇歌飲鄒南皋作

洞庭長蛇一夜枯千人萬鬼驚歡呼嶺表流人歸滿塗今君
 奉詔來上都憶昔投荒向萬里聞君母老復無子君不識我
 我愛君常恐一旦含冤死天摧地折白日墮命寄羣虎欲誰
 恃魚龍送君置我前落日開筵面秋水平生結交盡賢豪昨
 見吳趙今見爾君亦先會知我名獄中得自艾先生公等袞
 袞皆大用海內何愁更不平長跪進君黃金杯悲風颯颯從

天來欲飲不飲何為哉不見爾鄉劉侍御白骨今為螻蟻截
送李修吾謫東昌府推

古人無復望已愧李司農斷羽猶為鳳批鱗欲觸龍太平方
欲見狂直合優容海上憂時者君門更幾重

寄魏山人

千里憐同調春風招隱情白衣隨野鶴青眼待狂生遠水荒
煙斷平林落日橫何時遊太室雲外聽吹笙

寄魏懋權時乃兄以言得罪

浮雲滿天地吾道竟何其仕路生俱拙交情死不疑鵲鴿君
有淚烏鵲我無枝昔憶同樽酒茫茫未可期

柏鄉送歸德沈龍江相公一首

別深相見一舒顏末進那堪鬢亦斑束帛祇妨高臥穩安車
仍與太平還虛無莫道夔龍業恍忽初離虎豹關筋力喜看
猶自健羽儀今日在山間
飛書作者何男子善類紛紛畏禍殃詣闕省郎朝上疏呼天
愛女夜焚香生還暇恤時艱阨傳食猶沾帝寵光留宿柏人
無所慮相望一水即家鄉

田按妖書事起首輔沈一貫喉御史康丕揚等引已
罷侍郎郭正域因以及次輔沈鯉賴左都御史温純
力持之東廠太監陳矩亦不聽一貫指乃以瞰生光
具獄正域鯉獲免此詩飛書作者何男子善類紛紛
畏禍殃即指此事也

李三才一首

三才字道甫臨潼人
題名碑武功右衛軍籍陝西
臨潼人明史作順天通州人萬

歷甲戌進士授戶部主事歷郎中謫東昌推官遷南
 禮部主事歷郎中出為山東僉事歷河南參議山東
 山西副使遷南通政參議召為大理少卿以右僉都
 御史總督漕運加戶部尚書以事落職為民天啟中
 起南戶部尚書未上卒有雙鶴軒鷓鴣軒二集

明詩選陳臥子曰修吾雄豪自喜領袖羣倫又能詩耶
田按道甫縱橫之才揮霍自喜廷推閣臣遼陽失陷兩次嚮用而議不決僅以淮撫老此邊才誦道甫金縮歲月翻挑虜宵旰朝廷已論兵之句為之拔劍起舞

送張二遊天目魏大同賦

真成南國隱無事北山文酌酒君將去
 市月帆卷富春雲莫復愁孤寂長空足

冬日同歐楨伯諸公飲李通侯清嘯軒

雨雪江天抱病時衝泥騎馬去何之
 詞人共賦詩草色侵池春意動梅枝照眼驛書遲
 緣何事潦倒從人覆酒卮

李化龍

三首
 化龍字于田長垣人萬歷甲戌進士除嵩縣知縣遷

南工部主事歷郎中改吏部出為河南僉事遷參議
 歷山東副使河南參政入為太僕少卿遷右通政使
 以右僉都御史巡撫遼東進兵部侍郎乞歸起故官
 總督湖廣川貴軍務兼巡撫四川再乞歸起工部侍
 郎總理河道敘平播功晉兵部尚書加少保再加柱

國少傅兼太子太保諡襄毅贈少師加贈太師有襄

毅詩文集

明詩統于田諸作驍駟馳騁金玉陸離佳製也

明詩選陳臥子曰司馬功名之士詩亦清脫可誦

靜志居詩話于田詩雖沿王李餘波然頗爽豁牧齋

錢氏以其為胡元瑞所稱譏其醜厚肥膈而棄之不

錄未免矯枉也

田按于田播州之功以一百四十餘日之期拓千餘

里之地改土設流建府二州縣十可謂偉矣海龍固

銅標銘云皇帝二十有八年播人不軌天王赫怒爰

整六師以誅不供粵有四月盡俘厥醜遂緒其宮方

三千里始入皇封載勒銅標永鎮西南臣李化龍又

收軍前銅鍋鑄鼎三等頒發土司永為鑒戒其銘云

維星拱北惟水朝東天王御極八方會同惟西南夷

各世其封惟敬天念祖庶不墜厥宗順天者吉逆天

者凶以為不信視楊應龍標今不存鼎土司中猶有

存者于田詩頗有豪氣

金臺篇贈李寶

我昔獻賦燕京道千載霸業迹如埽黃沙萬里接胡天白雲

滿地生秋草李君家在金臺傍俠遊早擅少年場爭博不伏

魯句踐擊劍全輕秦武陽金門十上策不收脫屣聊為汗漫

遊無魚不彈馮生缺失路還做季子裘今來弔古石城下與

君最是知心者醉後悲歌六代塵狂來睥睨長江瀉李君李

君且莫論與君燕趙氣長存何處江湖無釣艇何處茅簷無

酒樽與君明日扁舟去臂鷹獵兔老山村

吳明卿東遊泊舟江上同歐楨伯李惟寅方子及攜具

訪之

西來一棹下滄波共識關門紫氣過七子才名吳質少六朝

詞客秣陵多江雲入暮依尊酒浦樹含春起嘯歌剩有平原

十日與五湖煙月奈君何

送郎中兵備江西

為郎十載羨休文憲府新開列戟分倚劍共瞻牛斗氣建牙

親統鸛鵝軍潯陽九派平吞楚廬嶽千峯半入雲回首舊遊

佳麗地過江魚雁好相聞

孫鑛四首

鑛字文融餘姚人萬曆甲戌進士除兵部主事改禮

部吏部歷員外郎中遷太常少卿右通政以右副都

御史巡撫山東拜刑部侍郎改兵部總督薊遼保定

軍務進右都御史革職聽勘起南右都御史就遷兵

部尚書參贊機務加太子少保有月峯先生集十二

卷

靜志居詩話月峯勤學過於士安慧業不如靈運觀其論詩有云韓退之於詩本無所解宋人目為大家直是勢利他耳是何言與尸俊所云松柏之鼠不知堂密之有美樅者也

田按月峯與余君房論文書云王元美謂昌黎於詩無所解即鄙見亦謂然昨偶看古詩一二篇弇州如何能到竹垞之譏月峯是未見月峰全集也月峯齋中偶成詩云吟詩遠遜歷城李作字猶慚鄆縣豐其自知審矣

遠覽樓

壯邑城雙峙奔流江九迴閉閔接地起舸艦逐潮來爽氣三

秋勝雄觀百里開可憐枯旱後田野半蒿萊

陪省寮遊蓮花菴

野水通靈沼雲房傍帝家同官俱載酒乘興一看花園熟供

嘗果冰寒可浸瓜山公正耽飲馬足莫愁餘

與客談邊事

腥羶款塞緣何策西北銷兵已六年馬市約期招虜入龍廷
講佛乞僧傳射聲校尉晨搖珮游擊將軍夜啟筵聞說雲中
遭歲歉夷王猶給救荒錢

題畫

虛閣全當水面風曉來山色望朦朧白鷗江上幽人思都在
輕煙細雨中

呂坤一首

呂字叔簡甯陵人萬曆甲戌進士除襄垣知縣改大
同入為吏部主事歷員外郎中出為山東參政歷山

西按察使陝西布政使以右僉都御史巡撫山東拜

刑部侍郎有去偽齋集十卷

列朝詩集侍郎敷歷中外所至有聲跡講求經濟實
學皆可施行萬曆中鄭貴妃方擅寵撰女誠一書以
明德馬后為首侍郎序而刻之坐此為朝論所譁不
得大用君子惜之生平不求工聲律新樂府記載時
爭有古人諷諭之風

豫國士

身可漆炭可吞啞癩何足辭難酬國士恩君頭為飲器安用
我頭存橋下廁中誰在此義士甘心趙襄子君不見東鄰再
嫁妻能為後夫死

謝燕三首

燕字漢甫長樂人萬曆甲戌進士除行人歷兩京太

常少卿果遷順天府尹以右副都御史巡撫南贛進南刑部侍郎改北擢戶部尚書有天靈山人集二十卷

送蔡侍御謫尉馬邑

馬邑神仙尉烏臺侍從臣片言思悟主三疏竟危身花暗邊城雨葭迴黍谷春鳳雛雖鍛羽終不落風塵

宮人斜

埋玉空山土一坏落花飛盡水悠悠年年洒作啼鶻血遺恨春風十二樓

送游太初歸蜀

杜子堂西萬里橋使君歸去馬蹏驕詩成莫向啼鶻賦望帝

春魂恐未銷

李堯民 五首

堯民字耕堯濟甯州人萬曆甲戌進士除長洲知縣改永年遷御史歷大理丞進本寺少卿遷應天府尹有快獨集十八卷 大泌山房集耕堯近體朗秀

獨飲

牢落停雲徑淒其間字廬坐看秋已暮不醉欲何如菊在聊親酒玄成且罷書一聲天外唳孤雁又愁子 久雨忽晴晚坐

雲洗星初霽煙霏雨乍收誰來共明月獨坐一丹邱遠杵寒

相答孤鴻迴自愁可知蕭瑟意不是爲悲秋

題刁稚渠園亭

背郭園成二百弓鶯花無數水雲封山銜堞影當軒霽雨挾
松陰入徑濃坐領青霞供藻詠醉攜明月度芙蓉丹邱只在
衡門裏汗漫何煩五嶽蹤

送于駕部文若之中州河憲

梁園春散吹臺空且急宣房瓠子宮只恐彩毫閒不得青霞
片片落天風

侯中鵠趙庭言期臘夜文酒不果

月破霜空雪不分一尊親自領寒雲如何客有山陰興夜半
無舟御李君

支大綸一首

大綸字心易嘉善人萬厯甲戌進士除南昌教授遷

泉州推官謫江西布政司問遷奉新知縣有華平

先生集五十二卷

田按心易仕宦不達集中述多恩怨之詞所著永
昭二陵編年史沈景倩野編痛詆之觀其論大禮
以永嘉爲是新都爲非所顛倒如此安能執筆而
從南董之後乎

寄水部章循之

漉巾濁酒甕頭眠白眼逢人氣嵐然借問陽冰依幕客只今
誰似李青蓮

曾夢鼈一首

夢鼈字君瞻莆田人萬厯甲戌進士官甯海知縣

金陵懷古

萬雉名都尚儼然銷沈王氣轉堪憐
鹿遊故苑春苔滿鳳去空臺
夜月懸六代寢陵迷宿草五侯第宅付荒煙
鶯花不管興亡事點綴風光自歲年

林纘振 一首

纘振字公悅漳浦人萬厯甲戌進士官工部主事有

梅雲館集

東南嶠外詩話公悅卒年僅二十七官軍來一詩佳甚

官軍來

官軍來官軍來昨日江頭賊已回
將軍逐賊未百里將臺先向江頭開
戟手罵賊奴恨不蹴爾成塵灰
父老向前云將軍

幸勿嗔江頭賊過遺煙燼江邊剗戮餘千人
殺者不可救骸骨空為塵何不割取獻幕府
軍校猶博首虜銀君不見往年之捷亦如此
石壁城中二百家三百丁夫同日死總戎腰玉衣
鱗衣擊鼓傳觴奏凱歸海外孤城未解圍

顧國輔 一首

國輔榜姓張字惟德南京金吾後衛人萬厯甲戌進士

授刑部主事歷郎中出為襄陽知府遷浙江副使謫

寶慶知府

嘉善寺石壁

千林雨氣清新松藹如沐蒼厓
倏焉剖神秀勢超豁巨靈何年來
揮斤剡山骨森然萬奇鬼髹髹
互相逐哈呀若中開玲

瓏窅蒼玉地僻知者稀因之遠囂黷吾將謝纓組歸來臥茲麓

林兆珂 四首

兆珂字孟鳴莆田人萬曆甲戌進士除蒙城知縣遷刑部主事歷郎中出為廉州知府改衡州安慶有挈

朋草

四庫總目兆珂七律頗得錢劉風調
蘭陔詩話孟鳴詩醞釀深厚吐納風流
田按孟鳴嘗刻黃白仲詩集頗稱好事詩亦點化生
新如但拚得失甯論馬豈為公私故問蛙入夢蘧然
誰辨蝶出遊樂矣我知魚幾忘其為習見故事也

雜感

中夜不能寐起步庭南隅秋容何慘烈嚴雪沾我裾嗟哉芳

樹林銷落在須臾有生胡不適安有再來軀蜉蝣矜羽翼薨
薨何其愚

病起漫成

習靜疏朝謁庭莎過雨新鶴形甯怯瘦龍性故難馴問道無
河伯全生有谷神閒曹堪寄傲何必嘆前薪

閒居書事

會心豈在遠咫尺即濠梁鳥下窺緜帙花飛點石床無懷堪
命氏何有欲名鄉漫道潘郎拙閒居趣自長

晚渡羅江卽事

雨散千峯日漸昏數家煙火澹孤村微波弄月潮初上遠浦
歸雲樹半昏浣女踏歌喧古渡舟人指點話仙源宦情惟有

羅江識欲取鳴夷作酒尊

游朴 一首

朴字太初福甯州人萬厯甲戌進士除成都推官入
爲大理評事累官湖廣布政使有藏山集

白石舟中簡沈比部

蒼茫寒日暮繫檝楚江門共惜諸賢去誰招九辨魂客途還
自遣時事不堪論嶺表多醕酒愁時進一尊

朱期至 一首

期至字子得蘄水人萬厯甲戌進士除戶部主事歷
員外郎中終懷慶知府有王屋山人集

送胡之驥歸里

雨雪千村暮江城一騎還故人疏白髮吾意卜青山游俠愁
看劍風塵強破顏囊中詩句在那惜路閒關

伍讓 一首

讓字子謙衡陽人萬厯甲戌進士除中書舍人遷刑
部員外改禮部出爲雲南僉事改貴州厯河南參議

江西副使

贈濟上人

深居不用買青山飛錫煙霞此閉關香閣旃檀諸品淨六時
鐘磬老僧閒眼看分竹成龍種手自栽松待鶴還借問禪心
何所似白雲無繫水潺湲

曹一夔 一首

一夔字雙華武岡州人萬厯甲戌進士除行人遷御
史出爲浙江僉事有虛白堂集

寶方山

洞門瑤草白雲深千樹萬樹綠森森石床丹竈空流水試問
仙人何處尋

鄭須德 一首

須德字存修莆田人萬厯丙子舉人官彭縣知縣有
綠野堂集

采蓮曲

湖水綠於染小艇輕似葉十五採蓮女嬌歌搖短楫逢郎卻
不語郎去轉眉睫

黃閣 一首

閻字啟崇莆田人萬厯丙子舉人官永安知州

蘭陔詩話啟崇精繪事不爲形似自成一家

遊雙明洞

探蹟地靈古招提逸興開岩幽晴帶雨湍激水鳴雷落日麋
猿嘯空山雲樹迴眼前無俗慮扶病一登臺

麥秀岐 一首

秀歧字德徵南海人萬厯丙子舉人官萬年知縣有

澹遠堂稿

越王臺

黃屋何年易故宮荒臺登眺起悲風函關鹿走秦封割沛水

龍興漢使通城市萬家煙樹合江山千載霸圖空松杉不解
滄桑事依舊寒原自鬱葱

鎮海樓

松濤滿壑散炎埃飛閣凌虛爽氣開滄海波光侵檻入白雲
山色隔城來煙光寂寞呼鸞道古木蕭疏朝漢臺徙倚休裁
王粲賦故園風景且銜杯

黃朝賓 一首

朝賓字伯遷廣州順德人萬曆丙子舉人官長泰教

諭有山石洞稿

送陳山人讀書羅浮

四百峯高日月迴臺書從此謝氛埃遙分木客藤蘿幔更上

麻姑錦繡臺石臼曉春紅翠鳥名響玉笙宵奏鳳凰來澄心靜
夜丹光裏七十璇房次第開

草爲人所持不果進然江陵業恨其異已而海內皆服其風節矣君典四十年而天年壽不將命爾而王元美作墓表屠緯真作傳欲傳會曇陽子昇真之確至以妖夢厚誣光明磊落之君典是豈愛人以德者耶田按江陵奪情五君子抗論先後被杖君典擬救建言諸臣疏格不得上今疏存集中論者謂非擬疏之難上疏之難既未上矣存之何爲乎其貽江陵子嗣修書余見之於沈純甫南征錄中婉轉開陳不失忠告之義集反失載君典豪雋之士余閱朱竹垞詩綜施愚山宛雅所錄均不愜余意特從郊居稿中甄錄三詩庶幾見君典之豪情逸韻耳

敬亭望九華山

敬亭一以眺天外九芙蓉久矣懸清夢誰哉啟祕封浮雲高鳥沒落日綺霞重舊是仙人宅吾將跨白龍

有感

生平憐俠節世態薄狂奴意氣一金盡勳名一劍孤浮雲愁

李白歧路泣楊朱好棹扁舟去春風自五湖

汪山人子建自塞上歸賦贈

塞門寒色擁黃雲日落燕山酒易醺春水五湖歸夢杳尊前長揖大將軍

曾朝節

朝節字直卿臨武人萬曆丁丑第二人及第授編修

歷侍講諭德侍讀學士少詹事遷南禮部侍郎掌翰

林院事進本部尙書贈太子太保諡文恪有紫園草

二十二卷

共結蒲團坐

共結蒲團坐沈沈俗慮銷荒村羣動寂淨土萬靈朝響入疑

空梵聽餘轉沈寥定知車馬客終不耐塵囂

皇子百日

百日欣逢睿節新兩宮燕喜屬芳辰雲中鳳輦來王母日表
龍顏識聖人瑞氣正浮三殿曉歡聲齊動六宮春願將多壽
多男祝歲歲年年獻紫宸

馮琦十四首

琦字用韞臨朐人副使裕曾孫萬厯丁丑進士改庶

吉士授編修歷侍講諭德庶子進少詹事掌翰林院

事遷禮部侍郎改吏部拜禮部尚書贈太子少保天

啟初謚文敏有宗伯集八十一卷

穀城山房集北海馮公古體淵源漢魏而軼出於唐
近體沈浸盛唐而致極於杜

王錫爵文肅文章琢菴詩以情真為宗次傳聲調長
篇感激沈沈壯類老杜五七言律和雅會心絕不如近

時名家以浮音亢節自喜
明詩選陳臥子曰宗伯經術之士雖未冥搜亦能象

合田按用韞早達留心經濟時講筵久輟與同官余繼

登共進通鑑講義傳以時政尤究心當代掌故於祖

宗典謨先臣條奏能舉其要謂魏相條上漢故事可

為師法駸駸嚮用登揆席為沈一貫密揭而止文章

爾雅詩兼長各體論者謂與東阿于文定並為海表

人望云

述懷

女弟纔四歲舉步一何嫺向人輒下拜頗識嗔喜顏傷彼蕙
蘭花零落清霜寒疇昔多歡悰一一成悲端余亦慕弘達不
能割此難焚汝身上衣碎汝指上環九原長決絕撫膺獨汎

瀾

壬辰書事贈別鍾淑濂張伯任

世事亦何常慘舒遞相盪今日非昨日回首一惆悵聖人久
在宥君子始用壯漫同賈生哭實恃漢文量日月豈不照雷
霆未敢抗其日風塵昏黃雲自飛颺侍臣盡改服緹騎紛持
杖矯矯山陰公尺牘還內降庭蓄留侯策帝厭王陵慙赤烏
將去國白麻別命相省垣及選部一時盡屏放就中誰最賢
鍾張尤倜儻兩生軀幹小氣欲排巒嶂新從上谷來瞻落臨
邊將豺狼盡已屏藜藿誰敢傍古來直節士大半投炎瘴至
尊多優容忍使居一障視汝舌尚在幸汝身無恙莫忘國士
遇甯同庶人謗所惜正士去滿朝氣凋喪從茲天廐馬靜立
含元仗居然言路塞兼虞禍機釀傳言半疑信蓄意多觀望

稽首辭九廟尚欲徼靈貺國本苟不搖甯使臣言妄謗予非
諍臣執經侍帷帳吏隱類方朔諫說慕袁盎威顏尙不接肝
膽終難諒知無匡世資三山行將訪

田按萬歷二十年禮科給事中李獻可疏請豫教元
子帝大怒摘疏中誤書弘治年號貶一秩調外六科
給事中鍾羽正張棟等各具疏救大學士王家屏封
還御批力諫帝愈怒家屏引疾乞罷詔馳傳歸羽正
棟均被譴此詩矯矯山陰公尺牘還內降省垣及選
部一時盡屏放就中誰最賢是時帝寵鄭貴妃子福王
幾倖踰次立賴諸臣先後力爭越二年元子始出閣
講學如東宮儀

雙林寺歌

長安春風能幾許陣陣化作秋來雨蒼狗白衣那可辨古今
榮瘁甯堪數君不見玄明宮君不見雙林寺雙林寺主迹如
掃路人猶說繁華事憶昔金貂近帝樞轉日回天傾上都九

列有時觀進退五侯無敢同馳驅縱橫五鹿客交結霍家奴
 城中甲第連白虎城外浮圖下赤烏浮圖矯矯凌雲際乘豹
 驂狸鬪神異天中畫棟蟠龍螭階下豐碑蹲鳳翥天子親為
 降勅書宰臣不惜書名字布金刻玉神亦勞斲血塗膏鬼所
 忌從來執權如抱虎黃鉞一下無處所半夜雷霆飛赤霄百
 萬金錢歸少府罪厚難徵帝釋靈譴輕未霽君王怒大第深
 沈別有人野寺悽涼已無主試看今日蓬與蒿試看舊日石
 與牢豪華意氣竟何在寂寞樓臺空復高黃金臺前車已覆
 黃金陽中滿已撲何處流人泣向隅何人貴近欣當軸一歲
 花開一度春一年世事一回新惟有寺前松柏樹年年長對
 往來人

田按玄明宮劉瑾所構雙林寺馮保所構李空同何
 大復有玄明宮行余並錄之于無垢馮用韞有雙林
 寺歌子亦並錄之當時若王子衡公孝與亦有作俱
 嫌不稱

去婦行送別陳南濱侍御

戚戚復戚戚去婦長太息欲去難為別後心不去甯堪眼前
 擲不須逐去婦婦去何須逐昨日尊章偶不歡今朝姊姒笑
 相目等是君家婦妾命偏難住風雨何淒淒不見嫁時路郎
 君如浮雲雲暗復中開賤妾如流水水去何當回水流到東
 海千里始一曲妾行無所歸一步一躑躅留妾身上襦忍名
 曰合歡攜妾機中絲念君衣裳單去婦行色何草草人情反
 復誰能保束縕虛勞鄰母問織縑自有新人好新人貌舊人
 心妾命自薄君恩深君恩深妾何止休言嫁婦不出里倘君

別後能相理與君同生亦同死

秋夜偶成示舍弟

一院蟲聲合空階雁影過疏燈人不寐涼露夜如何逸思秋
來減歸心病裏多長安今夕月應照舊煙蘿

送公亮年丈出參閩藩

一出春明外方知道路難詞臣行作吏報主敢論官何日延
津合悲風易水寒天街明夜月寂寞倚舟看

過翠華岩

明湖看欲盡遠寺始聞鐘不識青蓮界芙蓉第幾重行披山
徑草坐對洞門松雲際傳清梵天香落碧峯

陪祀長陵

文皇陵墓枕居庸王氣連雲止鬱蔥原廟衣冠千古淚帝圖
襟帶萬山雄至今魚海無傳箭見說烏號有墮弓夜雨崆峒
仙仗杳六龍松柏尙嘶風

冬至拜牌

去歲茲辰供奉班中朝肅穆漢衣冠諸方盡入天王貢聖主
親郊太乙壇雲覆離宮華蓋轉霜清輦道玉珂寒虛疑咫尺
威顏在翹首天門謁帝難

過故相第

長安變態香煙霞賓客紛紛田實家燕子已歸誰甲第牡丹
空泣舊繁華十年黃閣沙邊路幾日玄都觀裏花寂寞重門
車馬絕後庭無樹夜棲鴉

庚子卷十二
送別孝與同遊赤澗茶圃

一會何堪抵別愁未能分手且同遊人家雞犬桃源路野水
蒹葭剡曲舟憶昨論心還聽雨卽今送遠更悲秋明年便是
湖山主期爾東鄰借許由

送魏中丞撫晉中

千里雄關接冀都岢嵐天外控匈奴試看鐵騎新行塞不比
金繒遠賜胡節制總歸中執法威名先到小單于塵清玉帳
渾無事獨立轅門片月孤

送孝與東歸一首

萬里蒼煙海氣通欲從何處望東蒙斜風細雨長安道賴得
分攜是醉中

素衣不禁帝京塵出郭看春已暮春我自倦遊君未遇楊花
如雪送歸人

王士性一首

士性字恒叔臨海人萬曆丁丑進士除確山知縣擢
禮科給事中改吏科出爲四川參議歷太僕少卿遷
河南巡撫疏辭以原官改南就遷鴻臚卿有五岳遊
草十二卷

泊鄞江

錦纜牙檣江上舟採菱歌斷雨新收白雲半掩林皋色紅葉
初驚海國秋水落魚龍游淺渚月明鷗鷺起芳洲客懷淡蕩
隨流水不倩蘆花相對愁

魏允貞 四首

允貞字懋忠南樂人萬歷丁丑進士授荊州推官徵授御史以言事謫許州判官遷南兵部主事歷郎中進光祿少卿歷順天府丞遷右通政以右僉都御史巡撫山西進右副都御史兵部侍郎天啟初追諡介肅有司理南銓光祿里居京兆銀臺撫晉等稿

文起堂集開府魏公五言如秋色近重陽飄零感異鄉久客鳳凰臺秋深鴻雁來浮名不可戀芳草又萋萋離心不可道楊柳自江干工於發端若一官來白下五字學黃初一路梅花發滿江春水流明時俱逐客佳節是他鄉白首爲郎意青尊送客情關河千里外風雨五更深微雨催寒食芳花滿故園等聯悉爲佳境

者謂遜其弟懋權

對落花有感

不堪南國裏又是落花時興逐少年去春歸旅客知病多因止酒愁到強吟詩寒食故園日芳菲憶滿枝

雨後憶弟

荏苒秋云暮淒涼客不禁關河千里外風雨五更深苦憶連床語微爲擁被吟病身歸未得知汝此時心

漢江逢費侶鶴年丈時由掌科出憲川西

春花分手薊門煙錦纜相逢漢水邊一唱郢人回白雪千盤蜀道入青天劍光忽動豐城紫關吏能傳柱下玄莫以論思耽侍從少年驄馬幾人先

酬寄邱太史

西來春水接天流楚客歸帆不待秋為有江頭芳樹色時時

回首仲宣樓

鄒元標 一首

元標字爾瞻吉水人萬曆丁丑進士觀政日以建言

謫成都勻召授吏科給事中復以言事謫南刑部照

磨遷南兵部主事改吏部歷員外郎中罷官起大理

寺卿遷刑部侍郎進左都御史贈太子太保吏部尚

書諡忠介有願學集八卷存真集十二卷

田按忠介以論江陵奪情謫戍吾黔黔士之從公遊者若陳給諫向象余輩縣顯鳳吳解元鉉各有成就都勻為公戍所勻守段孟賢葺鶴樓張公讀書樓以居公朝夕課諸生暇則尋龍山盤谷諸勝蹟幾忘其

為萬里戍客也一夕江夫人釀酒盡赤夫人曰吾鄉謂釀赤為紅娘子主大吉利事驗亦有此語吾夫婦可幸生還也未幾果有給事之召公去勻十五年門人思之即其講學處建南皋書院祠之至今俎豆不衰

春日赴白鷺洲

春水引行舟桃花夾岸流沙明栖一鷺雨過語雙鳩濁酒澆

孤興青山笑晚愁萋萋芳草綠無語對江洲

余繼登 一首

繼登字世用交河人萬曆丁丑進士改庶吉士授檢

討進修撰歷中允少詹事掌翰林院事進禮部侍郎

擢本部尚書贈太子少保諡文恪有淡然軒集八卷

四庫總目繼登詩文平正清實無萬曆中佻薄之習田按萬曆二十二年帝從禮部尚書陳于陞言勅修

本朝正史遂命于陞及尚書沈一貫少詹事馮琦及世用爲副總裁而閣臣總裁之世用疏言纂修帝紀有不可不自爲一紀者建文君是已有可不必爲一紀者恭穆獻皇帝是已世建文君是已有可不必爲一竟罷世用文章樸直切於時用奏疏尤其所長世用淡然軒集馮用韞序而刻之稱其文如孤峯斷崖居然干仞又如玄珠璞玉不假雕飾而磊落道士之氣時溢毫楮詩亦時有合作

送張端叔大參之大梁

河橋三月暮春色曉氤氳黃鳥方求友青樽卻送君魂銷燕市酒心折太行雲兄弟飄零甚天涯忍更分

宮怨

屏帷向月夜窗幽坐對星河黯自愁獨有齊紈伴寂寞涼風又到殿西頭

馮夢禎

三首

夢禎字開之秀水人萬曆丁丑進士改庶吉士除編修以事謫官量移南國子司業歷右庶子拜南國子祭酒有快雪堂集六十四卷

列朝詩集開之詩文疏朗通脫不以刻鏤求工
構李詩繫開之登臨古什追蹤陶謝律絕雖多艷體
亦有生香真色之妙
靜志居詩話公儒雅風流名高三席歸田之後間娛
情聲伎箏歌酒謔望者目爲神仙中人詩亦不蹈時
習五古能盤硬語尤見意匠經營同譜若沈君典屠
緯兵皆不及也

廿五日曉泛山行歷龍井諸處還孤山湖

清旦踐夙期泛舟益新侶和風沁肌骨初旭媚空水水窮山色親徑曲樹容美龍泓晝常陰竹閣晴疑雨返策循廣隄沿流越孤嶼落日纈通川紅芳爍羅綺青帝無回驢春物甯淹

晷濃淡準疇昔羽停情靡止
餘不溪聽夜雨

尋山洽在晨枕流眷茲宵夢斷
微涼波響滌餘囂寤寐咸有契甯得滯流潮

大婚禮成紀

遙望長秋屬帝宮天門瑞氣鬱葱葱
雲開引上公彩鳳齊鳴二殿曉天桃並發萬年紅甯論漢代
昭陽寵還嗣周南窈窕風

顧紹芳 一首

紹芳字實甫太倉州人萬歷丁丑進士改庶吉士除
檢討遷贊善有寶菴集八卷

省中觀芍藥

芍藥天邊種當階裊數枝宮雲依檻溼蜀錦帶煙披態為東
風弱香從湛露滋花中誰更豔春後肯言遲伴日臨仙液含
情媚鳳池憑闌寄情賞爾亦倍恩私

姜士昌 一首

士昌字仲文丹陽人尚書寶子萬歷丁丑進士除戶
部主事歷員外郎中出為陝西副使進江西叅政以
言事鏤三秩為廣西僉事再謫興安典史天啟初贈
太常少卿有雪柏堂稿

金山寺

煙雨片帆收閒尋物外遊鳥歸吳苑樹僧下廣陵舟海近寒

潮壯天空木葉秋江流足禪意對此共悠悠

謁延陵季子祠

末路誰堪問維舟獨謁君空山響流水古渡駐寒雲醺酒酬
高誼荆碑惜斷文遺風如未遠吾輩挹清芬

張維新 四首

維新字憲周汝州人萬歷丁丑進士除冠縣知縣擢
兵科給事中改禮科出爲湖廣參議改山東歷山東
天津陝西副使陝西參政按察使進布政使有餘清
樓稿二十五卷

田按憲周不以詩名而首節殊覺爽亮

得方職方書

故人羈長安悵望何時遇錦字烏銜來金臺夢飛去風高碣
石館月白津門渡置書懷袖間二復披情悰

夷門懷古

朝登大梁城暮出夷門道四野起悽風令人愴懷抱汴水東
流西日傾魏家宮殿夕煙平殘碑剝落古苔字行人猶識侯
生名已矣侯生及朱亥鼓刀意氣今安在松楸荒塚狐兔穿
禾黍空原市朝改陳迹荒涼起暮哀信陵旌蓋俱塵埃山色
不知公子去柝聲猶似抱關來倚劍行行發長嘯世代興亡
那可料節俠豪華奚重論月光還向夷門照夷門道動悲歌
古人慷慨今如何夜深繫馬垂楊下無奈霜天白雁多

南安春日思歸

嘉峪漢封尾河州天盡頭山通去國路雲凝望鄉樓雄劍衝
星起悲笳落日愁羈心與奔浪夜夜向東流 天白孤

崆峒山

會接圖經戴斗匡廣成官殿自軒皇襄城七聖迷來往少室
三花入混茫丹鼎依稀仙犬護蒼山縹緲紫鸞翔我來問道
千年後雲鎖高臺迹半荒

徐桂 一首

桂字茂吳長洲人居餘杭萬歷丁丑進士除袁州推

官有大滌山八集

列朝詩集茂吳為袁州推官恃才自放坐計吏斥免
四明屠長卿秀水馮開之與茂吳同榜皆失官家居
扁舟白袷往來吳越間長卿負才敏捷又手擊鉢時
人皆遜避之獨茂吳與之抗行尤多詠物艷體之詩

留連唱酬至數十百篇

飛絮篇

江城三月豔陽時楊花如絮飛參差悠悠宛轉知誰繫歷亂
輕盈不自持可憐朝散銅池裏可憐暮落章臺市閒逐遊絲
去復來細紫花片低復起灞橋繫馬及芳辰白門藏鳥過上
春吹入桃樓全誤粉飄將舞席半成塵仁高隨鳥沒遙空漸
卑趁燕遮簾櫳花飛猗靡如迴雪質輕流便不因風因風迴
雪何綽約偏從芳甸穿香閣東舍王昌暫寄蹤西鄰宋玉聊
棲託跡方蕩子少甯居命憐賤妾多輕薄其奈蕭疎欲盡春
已覺繁華不如昨條風布煖水流澌池邊林畔始垂絲小小
葉間分翠黛盈盈樹下鬪腰肢而今棄擲將何道而今轉薄

庚錄卷十二
同秋槁攀條倚樹重留連行樂韶年苦不早淒淒草徑總鋪
甌茫茫榆塞詎成綿巨辭芳樹猶依榭夕化浮萍已逝川子
規聲裏千花歇搖蕩春光劇可憐

楊起元 一首

起元字貞復歸善人萬曆丁丑進士改庶吉士授編
修歷修撰司業洗馬乞歸起祭酒未任擢南禮部侍
郎就改吏部天啟初追諡文懿有文懿集十二卷續
刻家藏集八卷

擬陶徵君飲酒

仲淹生隋世麟出非其時上策不見收由然與世辭講學河
汾間斯文其在茲知命故不憂盡性吾何疑大哉中說書周

公豈我欺詆譏傷予心願從子所之

趙崇善 一首

崇善字伯堅蘭谿人萬曆丁丑進士除婺源知縣擢
御史歷太常少卿

善六湛上人還括蒼

名僧有湛公來自括蒼東跌坐揮塵談淨理天花亂落天池
中今朝復往括蒼去山鳥山雲留不住送君澱江江水清好
山兩岸片帆輕何時再過棲真地中夜虛堂對月明

張文耀 一首

文耀字芝陽沅陵人萬曆丁丑進士除銅梁知縣改
巴縣徵授御史出爲雲南副使歷四川參政就遷布

政使有二酉洞草

夏日同客集北郊崇興禪閣

青山曲曲抱孤城山外晴嵐倚檻生別後風塵堪一笑重來
邱壑倍多情天連遠水浮雲盡寺擁長林落照明我自十年
稱吏隱對君何惜放歌聲

朱維京 一首

維京字可大萬安人尚書衡子萬歷丁丑進士除崇
德知縣遷大理寺評事歷汝州判官進光祿寺丞有
訥齋集

詩藪可大詩高華雄邁

度飛虹橋

天影遙涵一水長清波深處石為梁平銷碧鬢連馳道倒瀉
銀河入苑牆晴綠乍添垂柳色春流時泛落花香微茫迴隔
蓬萊島不放飛塵到建章

圓通寺對月

萬丈芙蓉接玉樓孤峯遙挾兩湖流漢王坡上青天月時見
仙人控鶴遊

沈九疇 一首

九疇字箕仲鄞人萬歷丁丑進士授刑部主事歷郎

中出為江西副使遷四川參政改江西山東累遷江

西布政使有曲轅居集

田按箕仲詩是豐對樓一派嘗與孫月峯輯今文選
月峯任文箕仲任詩其論夙洲詩苦無完壁未免螳

探丸

早時走馬夜探丸新血模糊著錦鞍背地殺人酬郭解當場
說劍笑燕丹

傅光宅 七首

光宅字伯俊聊城人萬歷丁丑進士歷監察御史工
部郎中出為重慶知府改遵義再遷四川副使

謝在杭小草齋集伯俊詩出於性情而不出於豪舉
求之醞釀而不求之纖穠
田按播州改土歸流後伯俊知遵義府安輯流亡厥
功為多五言蘊藉取法唐人

舟中待友人

煙樹淡微月水風生夜涼扁舟垂楊岸葭菼何蒼蒼尊酒欲

斟酌孤琴待清張佇立望美人露下沾衣裳

發湘陰

春曉發湘陰山行思轉深花含昨日雨鳥作故鄉音樵子下
松徑田家依竹林平生愛隱逸白首違初心

留別狄明叔汶陽別業

來此便難去況茲遠別離晴雲落曲檻春鳥鳴深枝暫醉月
明夜相思花好時誰能當晚歲千里負心期

春日花下有感

江月江煙望白門春風春雨自黃昏年年楊柳無消息夜夜
梨花有夢魂蘇小香車松下路莫愁芳樹水邊村緘情欲寄
雙飛燕腸斷迴文是淚痕

庚鑑卷十二
吳門別屠長卿

扁舟歸自越江濱
客路逢君酒一尊
白雪歌成堪墮淚
青山何處不銷魂
魂城邊宿莽生寒燒
沙上殘潮落凍痕
無那風塵牽別思
依依還向醉中論

宿湯泉公館卻憶江南

高館臨空山山空深
幾許時聞泉上聲
誤作江南雨

感舊

花下門仍在尊前歌已休
惟餘舊時月還上水邊樓

陳泰來一首

泰來字伯符平湖人
萬曆丁丑進士除順天府學教
授遷國子博士改禮部主事
進員外謫饒平典史泰

昌卽昨贈光祿少卿有員嶠集

靜志居詩話員嶠年十八舉于鄉十九釋褐歸娶賜
內府金花燈籠知平湖事劉抑亭贈以對聯云秋進
士聯春進士大登科後小登科鄉里榮之公以氣節
自許居太學忤江陵因三王並封面質太倉於朝房
又疏請建儲旣因計典救孫纘謫饒平典史陞辭就
道賦詩有直道不緣三黜改孤忠或受九重知卒年
三十有六耳謫歸日夢至一山羣仙咸集賦詩云涼
風拂拂白雲收宦海年年幾日休翦紙作驢輕撥刺
桃花洞口笑淹留相與樂甚旁一仙云汝乾凌子也
後一年當再會於此覺而以乾凌子自號踰年而沒

塞曲

黃雲四合角聲哀
擐甲先登烽火臺
十道控弦齊落馬
幕中賓客上功來

沈自邠一首

自邠字茂仁秀水人
萬曆丁丑進士改庶吉士授檢

庚子卷十一
討進修撰有修撰集

本覺寺三過堂

遵塗出枉渚弭棹攀叢林石幢委陳莽殿壁生幽陰昔賢此
流憩登堂復沈吟往代蹟如埽名留感彌深悠悠東逝波閱
世成古今前賢既已爾何用役吾心

張敬一首

敬字爾和淄川人萬歷丁丑進士除中書舍人遷禮

部主事有儀部集

靜志居詩話爾和不以詩名聲律未能悉諧然頗有生趣如曇花侵斷壁木葉響空廊鷺下啄寒葦後垂
貼古藤故人滄海隔歸夢白雲深亦自流暢

寄懷李子亮昔同別業三峯

背郭草堂靜溪邊生事幽松聲響靈籟人語亂寒流貧病惟
書帙滄浪此釣鉤鄰翁勞慰問把酒話綢繆

陸可教一首

可教字敬承蘭谿人萬歷丁丑進士改庶吉士授編
修累遷南禮部侍郎贈尚書有葵日集

金華詩錄葵日詩秀色清韻娟娟自好

桃花峪

行行指青冥路人桃花峪夕陽寫山影蒼翠如可掬初聞流
水駛漸見澄潭綠苔髮淨可梳石子明如玉百尺清見底澄
泓瑩心目隔林聞犬吠擬就桃源宿

湖上

攜筇出深竹湖光已皎皎四望煙霧開空明盪清曉千峯雲
外高孤嶼望中小園林旣蒨鬱樓觀亦縹緲湖光本無受物
象何了了余心忽有會頓絕名言表

萬象春 一首

象春字仁甫無錫人萬歷丁丑進士選庶吉士改工
科給事中遷禮科都給事中出爲山東參政歷山西
布政使以右副都御史巡撫山東引疾歸起南工部
侍郎未上卒贈右都御史

王羽士水樓

水閣夜無暑談元心自閒烹茶供野客習靜閉柴關花豔池
中月煙迷湖上山本來忘世味坐久不知還

李玄齡 一首

玄齡字仁卿華陽人萬歷丁丑進士累官山西副使
平陽城西樓

華霍高城外平陽輦路存山川燕北里城關晉東門尙想懷
陵操重觀擊壤村漫嗟今古異譙鼓闕朝昏

甘雨 一首

雨字子開永新人萬歷丁丑進士選庶吉士歷南兵
部員外禮部郎中出爲廣西僉事改貴州遷福建副
使湖廣參政有翠竹青蓮二集

春日摩訶菴

淨土榜摩訶羣公選勝過春風開佚蕩佳日此婆婆地僻疑

韋杜人今似永和野花如有意片片點藤蘿

馮大受 一首

大受字咸甫松江華亭人萬厯己卯舉人除陽山知縣有竹素園集

弇州山人續稿咸甫詩和平能酌於深淺濃淡之間高不至浮卑不至弱

送徐光祿奉使還朝

玉冊臨江右星槎下帝京桐珪周典禮帶礪漢宗盟內署才名重中朝使節榮觀風應有得早晚達承明

明詩紀事

貴陽陳 田輯

庚籤

蕭良有 一首

良有字以占漢陽人萬厯庚辰第二人及第授編修歷中允遷國子祭酒有玉堂遺稿

大閱應制

國運千年泰皇威九伐張中春稽令典吉日簡戎行輦道雲霞繞旌門日月光前麾過細柳後隊出長楊遊騎諸陵俠材官六郡良金戈開霽色寶劍動星芒躍馬還超乘穿楊獨擅場無譁軍禮肅有備廟謨長會洛遵前古誇胡恥後王屈人

還不戰萬載奉明昌

江行

江水悠悠江路長孤鴻唳月有微霜十年蹤迹渾無定莫更逢人問故鄉

顧憲成一首

憲成字叔時無錫人萬歷庚辰進士除戶部主事改吏部謫桂陽州判官遷處州推官改泉州擢吏部主事歷員外郎中以忤帝意削籍歸起南光祿少卿不就天啟初贈太常卿以闖黨追論削奪崇禎初贈吏部侍郎諡端文有涇臬藏稿二十卷

田按端文與高忠憲講學東林海內推為山斗公嘗自言官輦轂志不在君父官封疆志不在民生居水

邊林下志不在世道君子無取焉與淮撫李三才交善三才為忌者所論公居林下貽書葉福清孫太宰為延譽時以出位責之三才有雄畧公之延譽自為世道計厥後論三才者多附闖黨麗名逆案一薰一蕕始有定論云

送虹賓

不盡臨歧意依依立馬看一經登第早三尺事人難月到河陽滿天連函谷寬之官有嘉譽倏爾遍長安

鍾羽正二首

羽正字淑濂益都人萬歷庚辰進士除滑縣知縣徵授禮科給事中改工科遷吏科都給事中以言事斥為民光宗卽祚起太僕少卿進本寺卿歷右僉都御史左副都御史遷戶部侍郎拜工部尚書贈太子太

庚鑑卷十三
二
保有崇雅堂集十五卷

四庫總目羽正清介耿直為時所重故集中奏疏多切中時弊詩多感激時事之作氣體尙道

註籍京邸

長夏何依鬱閉門自掩局雲來小閣暝雨歇遠山青謝客緣
多病憂時愧獨醒匣琴還自理苦調若為聽

南行

南經沂沐道極目總荒榛疲馬緣山徑孤鴻下水濱石田千
里瘠茅屋數家貧野叟時相語年饑一愴神

陳尙象 一首

尙象字心易都勻衛人萬歷庚辰進士授中書舍人
遷戶科給事中改刑科吏科以請元子豫教斥為民

天啟初贈光祿少卿有集

田按心易偕李獻可等疏請元子豫教帝怒獻可貶秩調外心易等奪俸半歲心易復抗疏爭帝益怒斥為民鄒忠介之謫成都勻也心易及門請業為名弟子心易卒忠介誌其墓序其疏草人謂不愧師門云

便河詩 并序

雲故有便河實始於正德間兵憲李公麟歲久迹湮
鞠為蔬圃今憲使袁公甫下車譚及便河慨然曰茲
網繆之至計也可廢不舉乎捐俸斥緩計徒採石自
小河口築長隄若干丈引水灌於故道歷兩西門而
南與東山左掖諸水會流以達於龍潭民不告勞瘁
工不易歲時而長河如練與金城相表裏真可謂賢
勝兵十萬矣余聞父老言建城之初高皇命有司繪

唐鑑卷十三
圖以進恐諸苗憑高俯窺遂以御筆指點於東山之巔嗣是雖間有憑陵絕無敢從東門入者獨西北地形稍下故遠如正統之變圍城至十閱月近如壬癸之際軍民士大夫咸不得帖枕席茲河所係良非尠矣雲僻在一隅無他擾獨其害在苗耳公修永賴之利於百年廢壞之餘功德吾雲者詎有涯哉余烏得無紀乃爲詩曰

高城蕩蕩跨於東山高廟所經旣雄旣堅西北迤邐漫無坡陀以帶以礪實爲便河上醜江流達於龍潭金隄屹屹而北而南便河未開土不帖枕便河旣開賊至安寢維袁憲使紹蹟李公徹彼舊湮以護崇墉役不瘁民成不易歲我爲銘詩

以詔後世

章嘉楨 一首

嘉楨字元禮德清人萬曆庚辰進士除當塗知縣累官大理寺丞有姑孰集南征集中林草

姚旅露書章元禮送余餘不溪上作詩贈別中有白鷺一行曉青山相向春句初是曉鷺一行白春山相向青一倒便覺老練有趣

秋日田家樂

東園瓜比舊年稀西泚菰饒今歲肥桑葉未枯楓葉赤入城先買木棉歸

龍膺 五首

膺字君善一字君御武陵人萬曆庚辰進士除徽州

推官謫温州教授歷國子博士遷禮部主事復謫兩淮鹽運判官遷鞏昌通判歷同知遷南戶部員外歷郎中出爲山西僉事歷陝西參政拜南太常卿有九

芝集選十二卷

太函集君御詩鍛鍊精嚴

楚風補太常清廉放達才名冠一時

田按君御官徽州時入汪司馬洪中社由司馬以交

王元美元美贈詩云不嫌詩社累仍傍酒人過蓋君

御是時以詩酒挂吏議也晚與袁中郎善其詩不與

袁近才氣橫溢長篇不免拉雜頗近屠緯真一派

登南山過李白訪許仙故址

策杖南山巔天風吹我襟巖穴結茅屋落木悲蕭森上有丹液池纖鱗時浮沈云是許仙居好道隱嶽岑供奉探靈異擔笈眷幽尋振袖拂赤霞攀柯矚碧潯俯仰山水間悠悠良賞

音陵谷已代變先民予所欽詎能旦暮遇爲我豁逢心

宿廢邑端氏古剎偶書

役役疲遠征白日沙礫晦石樓鬱嶮岷沁流浩奔滙遺墟問晉封荒郭溯漢代名猶端氏存邑已先朝廢依稀聞絃歌颯沓聆梵籟寶相瞻摩尼法座湮蓬塊方丈閉儲胥山僧習耕耒古德有慈明宗門著風概曾遊澤潞間竄名渾火隊露宿造汾陽卒嗣昭公派往來楊李間

宋楊大年李都尉

把手遊方外西

河獅子兒須彌納纖芥元風邈不揚安復望若輩俯仰千古

人誰能契無礙那得慈明流與之談三昧

燈夕後晉邸以詩見懷次元韻應教

珪錫唐封地書傳晉世家淮王招桂樹楚客頌椒花寶翰標

黃絹珠函擁絳紗向來勞設醴密坐瀉流霞

得袁中郎小修洛下書并出塞詩用韻和答

雙袖朝飛石浦雲蘭林芳閣思氤氳
迎來一水桃根楫注就
三車貝葉文齋謝太常終佞佛
畧輸充國老從軍雅歌濁酒
渾無事朗月澄江獨憶君

寄楊修齡侍御按黔中

關河秋色片鴻翔萬里音塵問渭陽
繡斧遠馳天子使檄書
先斬夜郎王豪箋雙絕成遊獻俎豆
三賢借表章寄語花谿
耆舊社一尊煙月待漁航
修齡為先祖太渠公及蔣道林文
橋菴兩先生建三賢祠於黔省以
三賢皆黔省名宦又皆吾里人也

史旌賢 一首

旌賢字廷徵大理雲南縣人萬厯庚辰進士除內江

知縣徵授御史累官副史

偶成

吳門市卒安在楚狂先生何之閉關厭聞新論中酒且刪舊
詩

黃克纘 一首

克纘字紹夫晉江人萬厯庚辰進士除壽州知州入

為刑部員外郎累遷山東布政使以右副都御史巡

撫山東累功加兵部尚書參贊南京機務召理京營

戎政改刑部加太子太保復改兵部加太子太傅移

疾歸起工部尚書加太子太師乞歸起南吏部尚書

不就有乘槎稿

田按尚書立朝好持異議與清流為難故三朝要典極詳之雖晚以忤闕去不能蓋前愆也

黃田驛次胡二溪先生韻

古驛清溪上空階草色侵愁聞寒雨滴坐久白雲深短缺中原志清尊五岳心酬知懷國士搔首愧華簪

許弘綱 一首

弘綱字張之東陽人萬歷庚辰進士除績溪知縣改

金壇人為給事中轉兵科都給事中歷左通政順天

府尹累遷南兵部尚書贈太子少保有羣玉山房集

山房卽事

天私一壑老臣閒溪上柴門白晝闢僧磬有時來竹裏酒船

無日不花間開籠夜放林公鶴挂笏朝看謝朓山澤畔主恩

原不淺行吟何事損朱顏

柳希點 一首

希點字汝志蘭谿人萬歷庚辰進士除贛州推官入

為工部主事歷郎中出為松江知府改南雄遷徽甯

副使有桃源里草

方正學先生以忠孝流芳題額追贈先祖瞻仰生哀感

而有作

先生秉忠孝厄會丁其時慟哭對新朝臣志日星垂一死不

求名寂寞葬江湄大書補史闕生氣猶淋漓

先祖諱敘景定甲子由曹監以

賢良方正仕蘭谿尉因家於蘭谿之城西祥興己卯宋亡大慟絕粒五日而卒遺命藁葬中野不封不樹吳正傳為作墓

誌

鄒觀光 一首

觀光字孚如雲夢人萬曆庚辰進士除吏部主事乞歸起南兵部郎中擢太僕少卿有孚如集

蒼霞草孚如古詩深沈近體流麗

卜居東隅

倦仍投筆去閒即載書來已近黃花節能無竹葉杯江山千古色詞賦一時才試望晴絲捲浮陰為我開

石崑玉 一首

崑玉字汝重黃梅人萬曆庚辰進士除戶部主事歷郎中出為饒州知府改蘇州紹興遷山東副使歷福

建參政以石僉都御史巡撫大同有齡山堂蘇州石居士等集

悼亡

自結絲蘿日遂成連理枝一生貧病侶半世影形隨落葉敲窗夜殘燈倦枕時不知人去遠猶作在堂疑

余寅 一首

寅字君房一字僧臬鄞人萬曆庚辰進士除工部主事遷禮部員外歷郎中出為陝西副使遷山東參政入為太常少卿有農丈人集二十八卷

甬上耆舊集農丈人詩癯而堅質而峭介然之色絕似其入

雨後灘行

房奎卷十三
雲帆未可賒，雨外更天涯。日日懸蠻鳥，山山躡躅花。松根輕
牒子，溪水野人家。見說灘頭濁，朝來幾尺沙。

邢雲路 四首

雲路字士登，安肅人。萬曆庚辰進士，除繁峙知縣，改
汲縣，再改臨汾，徵授兵部主事。歷員外出，爲河南僉
事，歷參議，副使，按察使。有澤宇先生集十卷。

過故關懷友

行矣日云暮，馳驅過故關。鄉心隨落雁，客淚墮寒山。世態黃
金盡，交情白首難。有懷卻遠道，愁絕水潺湲。

井涇過王廣文

天涯逢故友，相對轉淒然。薄宦同爲客，浮生各問年。琴尊開

絳帳，詩句冷青瑣。去住憐今夕，燒燈又別筵。

悲秋

青山堪伏枕，羈客亦悲秋。何處孤鴻唳，銷魂明月樓。

贈歌者賈遷

一曲高歌酒一卮，聲聲哀咽竹枝詞。登高送遠欲歸去，滿眼
雲山好贈誰。

楊于庭 一首

于庭字道行，全椒人。萬曆庚辰進士，除濮州知州，徵
授戶部員外，遷兵部郎中。有楊道行集十七卷。

四庫總目道行五言古詩時露清挺

對月懷余宗漢

唐鑑卷十三
愁緒亂如絲恩君對月時自知無住著不復怨睽離魄落仍
呼酒神來但賦詩八壺山色好頭白是歸期

臧懋循 一首

懋循字晉叔長興人萬厯庚辰進士官南國子博士
有負苞堂詩選九卷

四庫總目懋循詩多綺羅脂粉語

列朝詩集晉叔風流放誕官國子博士每出必以棋
局蹴毬繫於車後又與所歡小史衣紅衣並馬出鳳
臺門中白簡罷官時南海唐伯元上書議文廟從祀
恭進石經太學與晉叔偕貶同日出關湯若士詩云
卻笑唐生同日貶一時臧穀竟何云藝林至今以為
笑談
靜志居詩話晉叔精曲律持論斷斷不爽詩亦不墮
七子之習故雖從元美讌遊不入四十子之目亦磊
落之士也
田按晉叔官南都時入曹石倉詩社詩雖綺靡亦有
清致

集沈氏水亭餞送曹能始北上

相送江亭暮尊空客漸稀楊花不解別到處逐君飛

林廷陞 一首

廷陞字彥賓莆田人萬厯庚辰進士官廣西副使

送黃全之遊粵

迢遞南州地掉頭賦遠遊溟南長欲雨海國易生秋樹遠淨
空出江寒背郭流異鄉殊節候慎勿久淹留

車大任 一首

大任字子仁邵陽人萬厯庚辰進士除南豐知縣謫
平谷尉遷遵化知縣入為南評事歷禮部郎中出為
福州知府改嘉興遷浙江副使進參政有囊螢閣正

續集四十卷

靜志居詩話子仁詩頗閒放無局促態
沅湘耆舊集邵陽車氏以文學世其家幾於人人有
集皆自子仁發之

過秋田訪胡先生墓

行行邵陵西秋田君故里墓碣久淒涼花竹空如綺懷古亦
何心踟躕獨不已詩魂千載存云我誰何氏

同宋明麓甘昆原曹南麓唐元宇高吉軒登雙清亭

白蘋涼露楚江東臨水看山中鳥同雙棹正逢溪水合百錢
何惜杖頭空秋生花樹歲髮後人在樓臺曉靄中明日分攜
南北去不知何處聽征鴻

王庭選 一首

庭選字敬卿華州人萬歷庚辰進士選庶吉士授編

修遷修撰有松門臺八卷

馮琦宗伯集敬卿詩有沈鷲邁往之氣

恭侍經筵有述

鳳輦初迴仙路平虎闈朝啟曙華生瑤編風度芸香細黼座
煙浮玉几橫繚繞星文環北極殷勤天語下西清愚臣經術
慚無補何幸年年侍聖明

張萱 一首

萱字孟奇博羅人萬歷壬午舉人授殿閣中書歷戶

部郎中有西園存稿

畫史會要孟奇雖不以繪事名家偶一為之頗饒別
趣

庚鑑卷十三
靜志居詩話孟奇熟於典故周見洽聞著書頗多其在西清重編文淵閣書目具載卷帙補前人之闕漏惜乎香廚所存已失其什九矣

弩臺

遺鏃聞耕叟登臺傷客心
初煙扶岸上片雨隔溪深
往事隨芳草秋風生遠林
南朝一溝水鳴咽到如今

九日平原舟中

秋色日云暮客行猶未休
微霜渡遠水寒雨逗歸舟
九日殊方節千山落木愁
不知三逕菊開徧幾叢秋

何三畏一首

三畏字士抑松江華亭人
萬歷壬午舉人授紹興推官
有漱六齋集四十八卷

送康季修南遊

任俠康公子丰標衛叔流
才名高入洛詞賦重登樓
結客千金散探奇五嶽遊
長干多北里風月莫淹留

金清對面... 貴陽陳田輯

明詩紀事

貴陽陳田輯

庚籤

朱國祚一首

國祚字兆隆秀水人萬歷癸未第一人及第授修撰... 閣大學士改戶部進武英殿大學士加少傅贈太傅... 謚文恪有介石齋集二十卷

朱彝尊明詩綜曹潔躬云文恪詩婉秀軒軒震舉一... 無俗塵朱明諳云文恪詩如冰荷在壑冷香襲人俞... 右吉云太傅詩自抒性情不事沿襲諸體俱合不失... 正始之音

田按文恪詩清挺介石齋集不傳賴文孫彞尊輯詩
綜所錄甚夥猶得觀其大畧

摩訶菴觀杏花作

摩訶菴外袖吟鞭繁杏春開十里田曾與村翁舊相識看花
不費酒家錢

明詩綜吳巨平云元時杏花齊化門外最繁東岳廟
石臺羣公賦詩張燕傳為盛事葛羅易之詩云上東
門外杏花開千樹紅雲遶石臺最憶奎章虞閣老白
頭騎馬看花來至明城東花事衰郊西漸盛萬歷後
摩訶菴杏花多至千株吾鄉朱太傅養浩詩云云承
平之日翰苑風流後先一致也

李廷機 一首

廷機字爾張晉江人萬歷癸未第二人及第授編修
累遷祭酒進南吏部侍郎改北遷吏部尚書兼東閣
大學士參預機務加太子太保贈少保諡文節有集

十八卷

頌歷恭紀

當陽瞻聖主布朔御明堂帝德三台耀皇風八表翔葭灰隨
律動莫莢應時昌歷協軒轅紀恩頒鴛鴦行紫函浮瑞彩黃
道燭榮光共道璿璣正還看寶籙長

劉應秋 一首

應秋字士和吉水人萬歷癸未第二人及第授編修
遷南國子司業召為中允歷洗馬諭德庶子遷國子
祭酒贈禮部侍郎諡文節有司成集
存真集司成劉公詩文雍雍舒徐出入韓歐間

題張洪陽閒雲館

心遠喧常靜身閒道自夷因兼大小隱閒誦去來詞書案風
開帙花闌雨濯枝淨雲同此意行住本無期

葉向高 五首

向高字進卿福清人萬歷癸未進士選庶吉士授編
修遷南國子司業就遷中允歷諭德庶子充皇長子
侍班官擢南禮部侍郎就改吏部召拜禮部尚書兼
東閣大學士加太子太保進文淵閣大學士加少保
改戶部進武英殿大學士加少傅兼太子太傅改吏
部進建極殿大學士加少師兼太子太師崇禎初贈
太師諡文忠有蒼霞草續草餘草二十卷紀遊小草

八卷

姚希孟松瘦集李長沙相業人多疵之乃其處事圓
敏又有憐才之心於逆瑾時多保全善類近日福清
公頗近之福清詩文亦庶幾步武長沙但長沙能推
敲以就模範而福清多出之率易則後先人之不相
及也
列朝詩集公為人疏通明敏小心恭順受神廟特眷
當宮府睽隔黨論紛呶之日以調停劑和為能事應
機圓而見事捷不動聲色使人主信而從之再起則
拯人為政羣小關通能以智免善其進退公去而國
事益不可為矣公與江夏郭美命同館以文章互相
推許皆有集行世公詩文信筆輪寫長於獻酬流俗
而美命滔莽自運敢於評量古人截長補短則亦魯
衛之政也
靜志居詩話東林諸子奉福清為倫魁沙汰江河和
調水火海內服其公忠歸田之日蘊藉風流銜左相
之窪尊賂東山之棋墅詩品在山林臺閣之間諸體
皆具
東南嶠外詩話文忠有次許中丞澄瀾閣覽勝韻云
澄瀾高閣在嚴旌為愛波光四面平桑柘幾家湖上
社芙蓉十里水邊城龍臺煙鎖餘荒壘鯨海秋高罷
戍兵尊俎折衝多賸暇登樓又見賦先成近黃莘田
先生取此詩三四句書為楹帖懸之開化寺宛在堂

前十四字遂贈炙人口
田按萬歷中葉以後主荒於上政消於下雖有善者
無如之何文忠委曲效忠力窮補救時有舉江陵勳
績為當時對症藥者文忠日令江陵在凜凜救過不
暇何勳績之有然萬歷末年樞輔實無江陵才不得
以此謝責及再入閣閣人專柄得免於禍斯為智矣
文忠詩和雅有節可與東阿于文定抗行

題方正學先生祠堂

燕歌一夜滿都城大內采恩火徹明無復看書延侍講仍傳
天語勞先生兩朝事往君恩在十族煙銷詔草成為問精靈
何處是雨花臺畔子規聲

歌風臺

泗水亭邊御輦過只今人說漢山河風雲自護興王地父老
爭傳擊筑歌酒散夕陽宮樹冷臺臨春岸野花多最憐楚舞

情愁絕遺恨千秋尙不磨

林宗伯見示春曹卽事依韻奉答

綸扉重入幾星霜此地相傳有病坊

唐人以秘書監為宰相病坊又宋人嘲王隨云

誰說調元地
翻為養病坊

中使頻來催擬旨門官隨到報升堂虛言政事

歸三府但見文書列兩房

內閣有制敕
誥敕兩房

晝漏已沈初下直看

移日影下宮牆

莫愁湖

十里平湖帶畫橋當年歌舞惜妖嬌空餘菱鏡明秋水無復
蘭舟盪晚潮隔岸遠山分翠黛繞隄垂柳學纖腰風流未覺
穠華歇一望煙波醉不消

得請述懷

乍違清禁不勝情老去依依戀聖明
橐侈黃金重拜賜身歸
白社再尋盟休官妻子頻頻勸
入里兒童款款迎此日都城
供帳在相看已少舊公卿

于若瀛十四首

若瀛字文若濟甯衛人萬厯癸未進士除兵部主事
歷郎中出爲河南僉事歷南尚寶少卿就遷通政參
議召拜太僕少卿以右僉都御史巡撫陝西贈右副
都御史諡襄敏有弗告堂集二十六卷

焦竑澹園集念東詩不激而高不刻而工雋永藏於
溫醇纖穠寓之雅澹

靜志居詩話念東詩格未超然不肯作軟熟語
田按文若詩不入當時流派矯健之篇妙得古人氣
格

燕市遨遊追憶宋鵝池

結宇託窮嵐腰鎌入都城未聞巢與由
買山始逃名才傑捐
時尙翫世而達生門環七貴轍盤厭
五侯鯖傲睨橫今古懶
散廢逢迎浪迹雖易見誰尋理相形

青溪

自昔奢行樂今人亦解遊三山開麗壤
六代擅風流滔滔一
灣水銷盡古今愁

秋日登清涼臺

市遠曠佛宇霜林絢如繡孤阜憑風迴
突出香臺後危亭冒
其頂面勢巧爲構巖嶮鍾岫近睥睨江
光透雄壓白門麗峻
掩金川秀落木響空檐飄嵐潤衣袖薄
暮未肯下遠燈亂出

宿

馬對

冬曦澹廣野沙飛昧崇岡匹馬循荒谿冰結川無梁落日阻
三河野老僵路傍問之繫何人皺面髮且黃云是牧馬者十
室九逃亡我茲不及壯頽然不我將君從檀州來不見五馬
房房中日鳴鐘一笑傾千觴渠馬障錦裯而我囊無糧災沴
苦頻仍蔽天來飛蝗偃云鳳凰食詎止瓜瓠傷一日不再饋
芻秣安所望語既動長悲涕下霑衣裳遼將新出關選騎赴
沙場疇知養馬家頽垣秋草長何日罷防邊歸馬華山陽

宿靈巖寺

地以僧寮勝門兼客騎稀孤燈搖畫壁叢篠發清機谷靜鈴
風逗林寒法雨飛夜深攬衣坐轉覺欲皈依

過法藏寺尋愚上人同詣摩訶菴聽無絃彈琴

斜照下疏林禪關此日尋雲來生黯淡僧轉入幽深竹屋出
新茗石床響古琴戛然高韻在暝樹起層陰

再過清涼寺

再入清涼寺高臺覽舊都金陵猶王氣石壁自雄圖密樹依
城合澄江入雨無六朝人事改瞻眺獨踟躕

夏日村居

雜樹土能秀平疇夏不炎微風時薄砌返照故燠簾草地鋪
常坐瓦杯乾自添倦來索枕卧斜月挂纖纖

發靈寶縣

弘水西來曲抱城新秋雨色望偏清馬頭青嶂千尋起樹裏
黃河一片明入部星光催漢使近關人語半秦聲峇巽二華
知何處遙見氤氳紫氣生

宿龍興寺

龍興寺古轍迹稀寺前見山山雲飛獨槐裊裊蔭門靜亂水
潺潺觸石微入室僧定寂清磬盤空鶴來巢夕暉坐深煙歇
萬山暝松火幾家開竹扉

塞理菴老師再起薊遼總督志喜

上相行邊節鎮雄長城遙控帝城東旌旗曉下三巴水馳馬
驚嘶五國風偏將帳前聞射虎鯁生門下愧雕蟲么麼每欲
酬知己白首籌邊苦未工

長安冬夜詞

自昔峇巽上京朝朝車馬縱橫千山夢越鄉國一枕寒生客
情樓外塞鴻悲切窗前叢篠淒清沈吟永夜不寐濁酒無人
自傾

金陵春絕句

秦淮柳色弱於絲十里煙花澹蕩時明月一灣開水閣何人
吹徹玉參差

華嚴寺

逢僧宛宛著袈裟小閣焚香日易斜寺遠不知春已暮滿山
開遍石楠花

郭正域

一首

正域字美命江夏人萬歷癸未進士改庶吉士授編修歷中允諭德庶子遷南國子祭酒入為詹事掌翰

林院事遷禮部侍郎諡文毅有黃離草十卷

靜志居詩話文毅論樂府云今人全用擬議而無變化令人讀之如挾陳人口中珠殆為于鱗輩發也又言文章不可學一家詩必自三百篇漢魏六朝下至唐人皆在胸中筆底乃稱作家蓋有志而未造其詣者

黃鶴樓

樓閣重重上女牆昔人曾此醉為鄉煙橫巫峽千山遠雨過
瀟湘一水長依舊空中雲盡白不聞市上鶴曾黃從教玉笛
頻吹徹只恐神仙亦渺茫

殷都一首

都字無美蘇州嘉定人萬歷癸未進士除夷陵知州

入為兵部員外歷郎中改南刑部有爾雅齋集

唐時升三易集無美詩務為剗削自成機格譬之沃釜而炊不因人熱田按無美列元美四子之一無美晚達元美詩所謂跌宕詞翰林燧燧吐色絲異時平津拜不言公車遲也官職方郎為石司馬星所阨改南刑部旋罷官詩有豪氣惜集不傳余從岳陽彙勝集獲詩一篇亟登之

登岳陽樓望洞庭君山歌

我聞洞庭八百里日月出沒在其裏登高欲覽值晦冥俯視
一氣如太始何處來罡風吹雲清若空忽驅君山色盡落吾
杯中舉頭望湖波乃覺宇宙真無窮九江孔殷惟禹功不知
巨靈剖判誰為工近者撼城城欲動遠者黏天天欲通轉輸

銀河潤下土摩盪石鏡窺高穹九州一州大澤一澤何況大
瀛焉知其極我欲因之排闥出飛上君山瞰空碧宿火猶疑
軒鼎溫餘音未必湘絃寂不然酒香應滿山耐何惟令此兒
食黃鶴呼不來綵舟安在哉一葦詎可杭令我徒裴回于嗟
洵美非吾土家有洞庭亦如楚七十二峯點點浮持比君山
或堪伍其下一穴通此湖疇昔曾聞杰公語但舐青泥餒不
愁若拾玄珠幽可睹安得俯身試潺湲靈威丈人導我還未
能便逐羣龍去且自遨遊吳楚間

梅國楨 一首

國楨字克生麻城人萬曆癸未進士除固安知縣徵
授御史擢太僕少卿以右僉都御史巡撫大同進兵

部侍郎總督宣大山西軍務贈右都御史

感懷

薄俗不可問吾將還舊廬誰知肝膽在但覺鬢毛疏野老從
爭席王門莫曳裾由來彈鋏意不是歎無魚

朱長春 二首

長春字太復烏程人萬曆癸未進士除尉城知縣改
常熟陽信入爲刑部主事削籍爲民有太復文集

靜志居詩話太復頗類孫太初其宰陽信狀海濱風
土如海暗雲連舍春寒雨近城沙田惟種黍鹵井不
通泉過雨如霑雪無風自落沙白沙風裏下黃日霧
中生薄祿供囊藥齋廚費水錢頗盡其致他如折藕
露華白采菱秋水香悠然西湖曲坐對南屏山高樹
晨光動空山眾響聞麥花來社燕小雨破春泥落日
餘高柳空江起暮鐘酒船晴盡出賽鼓暝猶聞纜外
春沙沒燈前獨樹斜蒼藤緣戶結翠鳥落階飛驛火

依沙出春星傍浦懸孤飛江上鳥半滅雨中山皆秀
句也

歲事歌

除夜春雷隱地起小年歲雪紛未已黃泥乍融不肯凍百草
作芽青欲死草死不愁愁麥黃冬煖根薄恐易傷眼前米市
忽騰糶人間那得陳干倉城頭烏鵲無數叫父老對之愁斷
腸

春晚歸雲菴留題

細草迷巖路平田帶寺門春風遊客少宿鳥見人喧山翠當
虛坐花紅落小軒清幽愜所好况對道林言

趙世顯一首

世顯字仁甫閩人萬曆癸未進士除池州推官有山

居闕下入蜀諸集

送林太學

離筵開野岸芳草滿汀洲把袂此中別揮鞭何處遊鶯嬌吳
苑樹花暗越江樓莫謂春方好相思易及秋

虞淳熙一首

淳熙字長孺錢塘人萬曆癸未進士授兵部主事遷
吏部員外有權務山館文集二十五卷詩集八卷

棗林雜俎錢塘邵山人虎菴善吟繪讀書山中自隱
操郡丞新建喻楓谷均欲見之不得怒奪其山虞淳
熙詩老作間民不負租石濠石澗路應迂叩門雙騎
傳呼急一片紅塵山已無按楓谷擅聲藝苑傾慕緇
衣而事同伐木所以盤坏踰垣之寥寥也
列朝詩集長孺賦才奇譎搜抉奇字僻句務不經人
弋獲以為絕出於時賢頗心折湯若士屠長卿自詭
以真兀勝之雖未免牛鬼蛇神之誚可謂經奇者也

田按萬歷中葉以後詩道歧出長孺學仙學佛既無升天之質又無廣長之舌二氏語言一經運用便成鈍根斯又公安竟陵所不為者也

傲游仙詩呈心渠上人

仙家誰掌白榆城除目新看第一名為遣玉鸞三十一銜書

先報紫衣卿

張壽朋 四首

壽朋字冲齋南城人萬歷癸未進士除刑部主事謫

泰安同知遷廬州通判有深息窩集

田按冲齋詩有通脫之致

泗水亭

亭長未為薄王侯安足多眼前秦吏卒身後漢山河苦畏韓

彭在聊將父老歌達人一長嘯不醉欲如何

入山

從天分紫府有地似元都白髮餘生好紅塵一事無松筠何代種猿鶴聽人呼竟日長端坐冰心映玉壺

書門

多情纏葛藤一奮見鴟鵬緩頰人相賤低眉我不能無書干顯者有髮似高僧莫作寒蟬笑千秋劉季陵

白遣

人從山徑斷正喜草蕭蕭煙景春三月鐘聲寺六朝書多非佛老夢只到漁樵久矣無名姓還誰許見招

鄒德溥 一首

德傳字汝光安福人祭酒守益孫萬歷癸未進士改
庶吉士授編修歷中允遷洗馬有雪山草甸甸吟

九龍菴

杖到山窮處忽開祇樹林巖空松子落磴古蘚痕深野鶴有
仙格枯僧無世心此中觀太始靈籟夜沈沈

徐學聚一首

學聚字敬輿蘭溪人萬歷癸未進士除浮梁知縣改

吉水擢禮科給事中出為湖廣僉事歷山東副使福

建布政使以右僉都御史巡撫福建天啟初贈副都

御史

靜志居詩話弘正以前實錄儲秘館薦紳罕得寓目
此祝希哲尤朝野記徐昌穀翦勝野聞等書多齊東

野人之語自華亭在政府鈔有副本弇州見之故史
料始得其實敬輿國朝典彙一編亦從實錄采摭者
也詩亦尚聲格惜所傳不多

遊武夷溪山宿天遊觀

滄泓萬里流峭突萬古壁下有鮫人居沈冥不可識真宰欲
獻奇假我扶搖翼紛來眩目光獨往疲足力仙蛻吐雙塔佛
螺觀千碧三十六危峯元英媚几席把酒一酌之相對若主
客俄焉迷晚徑一壑聊與適

柯茂行一首

茂行字堯叟莆田人主事維騏孫萬歷癸未進士除

海陽知縣有柯亭集

夏日集胡氏園亭

茲晨愜幽期茲亭頗宜暑蘿陰漏白日花檻落紅雨藉草時
偶談看山或共佗取醉渾忘歸月出樓頭樹

葛曦 一首

曦字仲明德平人萬曆癸未進士改庶吉士授檢討
有太史集

讀二疏傳有感

翩翩雙引出長安回首青蒲曉月寒白髮最憐蕭太傅中書
未罷不辭官

王萱 一首

萱字季孺慈溪人萬曆癸未進士改庶吉士授編修
聖駕秋祀山陵兼擇壽宮恭紀

金支高映玉芙蓉騎吹聲連長樂鐘霜露九秋修祀典山川
百里闕靈蹤龍旂展轉清飈度鳳輦歸來瑞靄重嵩祝祇今
稱萬壽石門好與白雲封

庚子卷一四
翰臣字子卿莆田人尚書經邦子萬厯乙酉舉人有
三秀集木鳶集北遊草

黯淡灘

溪迴石瀨長崖束灘聲壯中流一葉下天地爲簸蕩歛如奔
電掣駛若輕弩放欹傾破層湍冥迷出高浪跌頓久未定相
顧色沮喪甯獨瞿塘惡膽落不可上誰能鏟危石坐使洪流
暢

曾仕鑑

四首

仕鑑字明吾一字人倩南海人萬厯乙酉舉人授中
書舍人遷戶部主事有慶厯公車羅浮和杜諸集

梁九圖嶺表詩傳人倩近體時露警拔

送任陳二子西遊

兵後同爲客悲秋奈別何一尊停桂水雙劍指牂牁世已輕
貧賤吾將老薜蘿飄然各歧路去矣慎風波

奉懷沈純甫

未是埋輪去如何請劍頻大臣方泣血小吏敢批鱗放逐懷
明主行藏鑿古人譴深非獨汝心折更都勻

寄陳士鵠

聞君剖竹夜郎西家遠天南不易攜籍占棘人迷漢語市通
金齒譯雕題花間負弩驅馴象夢裏看山賦碧雞歲晏獨愁
書阻絕嶺南關樹故淒淒

展于少保墓

塚樹陰陰掩翠微
旌功祠下一沾衣
金繪遠監南遷誤
玉輦親迎北狩歸
五相不辭滄海死
漢王宜出白登圍
翻憐鄂墓西湖近
今古英雄涕並揮

余祖頤 一首

祖頤字于正廣州順德人萬曆乙酉舉人除蘭陽教

別劉抱白練師遊楚
瀟湘西去路漫漫
拄杖秋煙岳色寒
七十二峯雲影外
不知誰共月明看

黃居中 二首
居中字立父一字明立晉江人萬曆乙酉舉人除土

黃居中 二首

居中字立父一字明立晉江人萬曆乙酉舉人除土

海教諭歷南國子監丞遷黃平知州不赴有千頃齋

集

列朝詩集明立專勤汲古得異書必手自繕寫僑居金陵年八十餘猶篝燈誦讀達旦不劬古稱老而好學斯無愧焉
靜志居詩話監丞銳意藏書手自鈔撮仲子虞稷繼之歲增月益太倉之米五升文館之燭一挺曉夜孜孜不廢讐勘著錄凡八萬冊墳土未乾皆歸他人插架深可惜也
田按尤西堂人史局撰明藝文志五卷後來史官以西堂所撰蕪雜荒謬削去底稿取黃氏千頃堂書目為底本以私家紀載而為一代史乘之目錄其收藏可謂宏富矣

閏冬社集永慶寺因登謝公墩

覽勝腸如渴沈陰約屢更茲遊風日美忽感古今情雲物仍
鍾阜人煙尚冶城未能忘小草徒爾負蒼生

答李與熙

故國煙霞舊山園
薜荔新一杯風雨夜應憶未歸人

四公... 登... 公...

何... 富...

... 知... 本... 以... 新... 野... 對... 面... 臨... 一... 以... 女... 陳... 文... 日... 如...

... 西... 堂... 人... 更... 以... 贈... 贈... 文... 志... 正... 往... 身... 來... 史... 官... 且...

... 梁... 梁... 河... 出... 也...

... 好... 不... 獨... 然... 益... 太... 代... 米... 正... 代... 文... 論... 之... 賦... 一... 獨... 御... 文... 好...

... 舉... 其... 無... 則... 語...

... 金... 與... 十... 八... 十... 額... 前... 難... 繼... 而... 實... 豈... 且... 不... 論... 古... 蘇... 文... 可... 以... 時... 結... 果... 即... 立... 專... 道... 效... 古... 昔... 撰... 書... 及... 手... 自... 辦... 寫... 論... 用...

... 謝... 維... 命... 獨... 南... 園... 于... 空... 空... 難... 難... 黃... 平... 映... 照... 不... 能... 肯... 于... 寒... 寒...

